

高道傳卷一

宋賈善翔撰 嚴一萍輯校

張道陵¹

張道陵母，初夢天人自北斗魁星中降至地，長丈餘，衣繡衣，以薔薇香授之。既覺，衣服居室，皆有異香，經日而不散，感而有孕。

天師張道陵，昔成都與鬼戰，奪二十四獄，俱為福庭，降二十八宿，以通正氣。時有鬼帥尚居青城山下，為人鬼貿易之所，謂之鬼市。天師至，則化為寶座以居之。兵固不能刃，火亦不能焚。於是鬼帥降焉。

真人領弟子還鶴鳴山，於桓帝永壽元年乙未正月七日五更之初，長昇見空中神仙騎吏一人，駕雲車徘徊於山之東南，大聲音

¹【案】歷世真仙體道通鑑卷十八所記為張天師一人，文長萬餘言，不類高道傳體例。三洞群仙錄十四引「天師鬼降」條，及類說卷二高道傳所錄「薔薇香」與「化出玉局」二條，雖皆刪節，而其文實見於通鑑。今以類說所記二事，據通鑑著錄；其「天師鬼降」一條，則因通鑑所敘不同，故仍據三洞群仙錄之文輯錄。

曰：「張道陵功行已就，將授以秘籙」。言訖，老君駕龍輿，真人乖白鶴，自渠亭山會于成都城下，老君同至，萬神湊迎，湧出一玉局，高丈餘，老君昇座，為真人再授道要，重演正一盟威之旨，說北斗延生經。以十五日上元再會于成都，說南斗經及演說諸經。真人聽畢，老君已回，玉局消散，已成空洞。

戴孟²

道士戴孟，本姓燕，名濟。漢末人。以謂養生者，隱其名字，藏其所生之時，改姓戴，託仕於武帝之朝。孟少好道，事母以孝。母服除，入華山，服朮。遇裴真人，授以玉珮金璫經，遂能輕身。周遊名山，日行七百里。

封衡³

封衡，字眉達，隴西人也。幼學道，通老莊學，勤訪真訣。初服黃連五十年，後入鳥獸山採藥，又服朮百餘年，還鄉里，如二十許人。聞有病死者，識與不識，便以腰間竹管〔中〕藥與之，⁴或下針，應手立愈。愛養精氣，不極視大言。凡圖籍傳記，●不習誦。復遇魯女生，授還丹訣，及五嶽真形圖。遂周遊天下，故山官水神，潛相迎伺，而凶鬼怪物，元不竄避。人或疑之，以矢刃刺禦，皆不能害。常駕一青牛，人莫知其名，因號青牛道士。魏武帝問養生大略？師曰：「體欲常勞，食欲常少，勞勿過極，少勿過虛。去肥濃，節酸鹹，減思慮，損喜怒，除馳逐，慎房室，〔春夏

²【案】三洞群仙錄卷十一「戴孟改姓」條著錄。

³【案】三洞群仙錄卷十五「君達青牛」條係刪節，歷世真仙體道通鑑卷二十一著錄。

⁴「中」據三洞群仙錄補。

施寫，秋冬閉藏」，⁵ 則幾於道矣。故聖人春夏養陽，秋冬養陰，以順其根，以契造化之妙」。有二侍者，一負書笈，一攜藥笥。有容成養氣術十二卷，墨子隱形法一篇，靈寶衛生經一卷。笥有煉成水銀霜、黃連屑等。在人間僅二百餘年，後入元丘山不見。

王暉⁶

道士王暉者，魏時人。白羊公子之弟子也。居華嶽熊牢嶺洞真觀，常種黃精於溪側，則虎為之耕，豹為之耘；出入亦乘虎豹，具●轡，行鞭策，如人乘馬●異。餌黃精蒼朮，積有歲時。其後以道術傳王法沖，乃尸解而去。門人葬冠履於巖左，有黃雲覆其上。嘗著秘訣百餘言，以教人〔修養，其事隱〕，⁷ 而人莫能曉。其辭曰：「黃帝昇鼎湖，乘素入紫煙。明精陰不久，運●馳龍旋。枯悴林將凋，鮮鱗沉深淵。遊仙騰霞觀，喜作歲月綿。晝占勿龜兆，夕唱良有緣。中嶽鎮和氣，般輪共成篇。若能思得之，賜與金一餅」。

葛孝仙⁸

葛孝先人呼仙翁。嘗從吳王船行至三江口阻風，船多漂沒，仙翁船亦不知所在。吳王歎曰：「仙翁有道，何不能免此乎」？乃遣使求之，踰宿，忽見仙翁水上行來，衣履不濕，既至，頗有酒容，

⁵ 「春夏施寫，秋冬閉藏」，據三洞群仙錄補。

⁶ 【案】三洞群仙錄卷五「王暉虎耕」條係刪節，歷世真仙體道通鑑卷二十一著錄。

⁷ 「修養，其事隱」，據三洞群仙錄補。

⁸ 【案】歷世真仙體道通鑑卷二十三所記為葛仙公一人，文甚長。三洞群仙錄卷六「孝先水上」條，即為文中一小段，核通鑑整篇文體與高道傳不類，亦不知所採高道傳文之起訖，姑據群仙錄之文輯錄之。

詰其故，〔乃謝〕曰：⁹「昨伍子胥強邀留飲，淹屈陛下於此」。
上忻然〔曰：「先生常為神靈所延，道德所致爾」〕¹⁰。

梁謚¹¹

道士梁謚者，字考成。京兆扶風人也。博通經史，雖陰陽占候之術，靡不精究。外聲利，薄滋味，唯以安閑自適。一日，相者見之，且曰¹²：「此子目流白光，貌集真氣，非常人也」。後果樂神仙道。大魏元帝咸熙初，事鄭法師於樓觀，時年十七。仁不勝生，和不好勝，人皆樂之。常夢與仙人遊，或登名山，或酌石髓，由是自有所〔悟〕〔娛〕¹³。至晉惠帝永興二年乙丑五月五日，老君命真人尹軌降于樓觀，乃盡弟子禮事之。踰月，遂授煉氣隱形之法，次授水石還丹術，卒授六甲符及采服日月黃華法。後隱於終南山，食●吞符，大盡其妙，又廣索丹砂，還而為餌。凡辭氣之出，則音韻清徹，自是欽奉者多，〔謚厭之〕¹⁴，乃深入巖谷。嘗阻大雪，鳥獸俱斃，而謚獨守寂。其志堅篤，故靈真自集，目能視地中物，耳能聽數里聲。一日，忽謂門人曰：「有朋友待吾於南峰，今須●矣」¹⁵。乃冠服而出，則雲氣迷〔繞〕〔統〕¹⁶，不見其形，惟聞鼓吹之音，隱隱於空。時元帝大興元年戊寅歲〔也〕¹⁷。

⁹「乃謝」據歷世真仙體道通鑑補。

¹⁰「曰先生常為神靈所延，道德所改爾」，據同書補。

¹¹【案】三洞群仙錄卷十六「梁謚夢遊」條係節錄。歷世真仙體道通鑑卷三十著錄，文全。

¹²三洞群仙錄「曰」上無且字。

¹³「據」按三洞群仙錄正。

¹⁴「謚厭之」據三洞群仙錄補。

¹⁵「一日」三洞群仙錄作「一旦」。

¹⁶「繞」據三洞群仙錄正。

¹⁷「也」據三洞群仙錄補。

吳猛¹⁸

吳君名猛，字世雲，濮陽人。仕吳為西安令，因家焉，今分寧縣是也。性至孝，齟齬時，夏月手不驅蚊，懼其去已而●親也。年四十，得至人丁義神方，繼師南海太守鮑靚，復得秘法。吳黃龍中，天降白雲符授之，遂以道術大行於吳晉之間。晉武帝時，許真君從世雲傳法，世雲盡以秘要授之。永嘉末，杜弢寇蜀，攻陷州縣，真君既誅大蛇，世雲曰：「蛇是蜀精，蛇死則杜弢滅矣」。卒如其言。嘗見暴風大作，書符擲屋上，有青鳥啣去，風即止。或問其故？答曰：「南湖有舟遇此風，中有二道士呼天求救，故以此止之」。驗之果然。西安令于慶死已三日，世雲曰：「令長數未盡，當為訟之于天」。遂臥於屍傍數日，與慶俱起。慶弟著作郎寶，感其異，遂作搜神記行於世。嘗渡豫章江，值風濤乏舟，世雲以所執白羽扇畫水而渡，觀者駭異。晉孝武帝寧康二年，真君上昇，世雲復還西安。是年十月十五日，上帝命真人周廣捧詔召世雲，遂乘白鹿車與弟子四人，白晝冲昇。宅號紫雲府。

潘師正¹⁹

潘師正者，字子真。貝州宗城人。祖居常，周楚州刺史。父寔，隋通州刺史。母魯氏，善言名理。師正始生有光，鄰母善骨法，謂此兒不仙即貴。及能言，授六經皆通。且曰：「此書外，有過此者乎」？母曰：「惟道德五千文爾」。遂誦之。及母病將危，謂師正曰：「死者人之大期，期至而●，吾何恨哉！然汝尚幼，不

¹⁸【案】三洞群仙錄卷五「世雲羽扇」條係刪節，歷世真仙體道通鑑卷二十七著錄，文全。

¹⁹【案】三洞群仙錄卷二十「子真乘驢」條係刪節，歷世真仙體道通鑑卷三十著錄，文全。

免為吾念」。師正泣血捧母手曰：「若天奪慈顏，某亦不能生」。母曰：「汝若毀滅，非盡終始之孝也」。師正殞絕良久，曰：「忍死強生，當絕粒從道，庶憑真教以為津梁」。母摩其頂，勉之。既葬，廬於墓，以孝聞。隋煬帝大業中有道士劉愛道，見而器之，曰：「三清之驥，非爾誰乘之」？時茅山王遠知為煬帝所重，每詔入禁中，躬薦松水以祈福慶。愛道謂師正曰：「吾非不欲爾相從，然成就功道，非遠知不可」。遠知既見，忻然謂愛道曰：「今日復有潘仙，吾教之幸也」。由是隸道士籍，授三洞隱訣真文。未幾，遠知請還茅山，師正待行，渡揚子江，飲穢水，痢下如凝脂。遂夢見一人，衣冠皓鮮，乘空而下，授白藥一粒飲之，及寤而愈。既至，遠知謂曰：「吾雖欲留汝於此，而嵩陽乃汝修真之地，當亟還也」。於是與劉愛道合居雙泉頂間二十餘年，復廬於逍遙谷，食飲惟青松澗水而已，洗心忘形與草木俱。所修經法有太清之道三，中真之道六，下真之道八。唐高宗幸東都，召見，請作符書，辭不解；復問山中所須，對曰：「茂松清泉，臣之所須，此山中不乏矣」。帝異之，遂莫留，即其廬作崇唐觀及奉天宮。又敕其逍遙谷作門，南曰「僊遊」，北曰「尋真」。時太常獻新樂，帝更名祈仙、望仙、翹仙曲。調露初，高宗狩嵩嶽，以車輿迎師正入嵩陽觀問道，復送至逍遙谷，見薜荔繩●將朽敗，餘無火粒之具，惟有兩大瓢，問何所用？對曰：「臣有青●飯。昔西城王君以南燭為之，服食得道」。既還都，命使江東造青●飯以賜之。每手詔撫問，皆具弟子姓名咨白，而法服香燭金帛，繼奉不絕，其感遇之盛如此。謂弟子曰：「吾實無用，天恩濫加，為道士，衣皆上之所賜，復處以崇構，興動土工，屠宰草木，驚撓禽獸，吾罪人也，必招冥譴。汝等少年學道，當求深山窮谷絕跡之處，則無累矣」。上在洛陽，又詔，辭不獲，遂館於天苑。逮還山，帝以詩送。永淳元年正月一日，谷之東巖，忽有簫管空歌之音，弟子來白，先生曰：「吾無所聞，汝勿為名以眩俗也」。忽謂弟子韓文禮曰：「為吾造石室於北

巖之下，夏末當遷居」。文禮未忍為，而促之不已。白曰：「北巖通靈嶽可乎」？曰：「吾居此五十餘年，降真者三，語要者七，各能精一，當自知之」。至六月十四日，索沐浴，書青符置湯中云：「終身淨也」。翌日將旦，聞猿鶴悲鳴，徘徊不去，至晚，聞石室未成，則曰：「果不濟吾用」。遽云：「去」。文禮問何去？曰：「泰山檢校功德」。至十六日復曰：「石室未成，權作瓦屋以實我，無改衣服，後百日，遷石室中」。是日雲氣覆庭，異香滿室，須臾解化，年九十八。詔贈太中大夫，諡曰體玄先生。先生神標仙骨，雅似隱居，夫階真輅真練景遊化者，其有類乎！弟子凡八人，並皆殊秀，然鸞姿鳳態，渺映雲松者，有韋法昭、司馬子微、郭崇真，皆稟訓瑤庭，密受瓊室，專玉清之業，遺下仙之儒矣。時陳子昂作頌。

寇謙之²⁰

天師寇謙之，字輔真。上谷平昌人。後魏刺史讚之弟也。遠祖仁，漢成帝時隱王屋山，白日飛昇，號明真先生。仁之孫曰雋，亦乘龍而去。父馮翊為河東太守，以秦符堅建元乙丑歲七月七日生天師，年十六，長八尺有餘。至十八歲，乃傾心慕道，幽感上達。有仙人成公興，傭於謙之從母家，因易之使墾田。一日於林下算周髀不合，公興因教之，應手而成，謙之乃嘆賞。有頃，忽謂謙之曰：「法師有意學道，可相與為隱乎」？遂與之遊華山，常採藥食，謙之自此不復飢。又隱於嵩山數年，一日謂謙之曰：「某出，當有人將藥相遺，但食之」。果如所言，視其藥皆毒蟲臭惡物，乃恐懼而出。公興還，具對，公興嘆曰：「法師未易得仙，但可為王者

²⁰【案】三洞群仙錄卷二「謙之師位」條係刪節，歷世真仙體道通鑑卷二十九著錄，文全。

師」。復曰：「某不久留，翼日午時當去。公興亡後，先生幸為沐浴，自當有人見迎」。公興乃入第三重石室而卒。謙之躬自沐浴，明日日中有叩石室者，謙之出視，見兩童子，一持法服，一持●及杖，謙之引入至公興尸所，公興倏然而起，著衣持●執杖而去。謙之遂守志嵩陽不復出。後魏明元帝神瑞二年夏四月一日，遽有二人衣翠衣羽服，冠洞雲冠，乘龍持麾來曰：「老君至」。徐聞音樂之聲，斯須，太上乘白玉車，九龍驂駕，威儀赫奕，神仙導從，集上山頂，謙之虔心作禮，見闕五宮門，臺殿岌然，太上坐白銀華林下，●仙伯王方平引謙之前立，曰：「吾得中嶽集仙宮主表稱：張道陵登真以來，修真之人，無所師授，今有中嶽道士寇謙之行合自然，宜處師位，故吾授汝以天師之任，及雲中音誦新科經戒，自開闢以來，不傳于世，今運數當出，汝宜修之，佐國扶命，以化生靈」。遂出新科經戒九卷，謙之受訖，五雲臺殿俱隱。太常二年正月十五日，太上復降，又賜新科符籙十餘卷，且戒之曰：「前後符籙，得人可按，授非其人，罪及汝身」。謙之稽首奉教，而後志行日新。太武帝始光中，朝廷遣洛州刺史梁公率官千餘人，詣山迎師至闕，而朝野未甚信奉，惟司徒崔浩師事之，上疏曰：「臣聞聖主受命，則天應以瑞，河圖洛書皆寄言蟲獸，未若今日神人對接也。昔漢高帝雖曰英聖，四皓猶不屈之」。上悟其言，乃命使奉玉帛告祭嵩嶽，及賜師宮館，前席問道，禮遇益恭。復欲授輔弼之位，師固辭，曰：「我今聖師太上四臨，神仙六降，並授天經科法，量其所感，乃真聖也」。遂建都壇，●靜輪天宮，制作威儀，一如經戒，於是天下歸仰焉。至庚辰歲，師請為帝祈福於中嶽，精誠通感，太上冥授帝以太平真君之號，並冠服符籙。師還具奏，是歲改為太平真君元年。二年，謙之奏曰：「今陛下以真君御世，建靜輪天宮，自古未有，當受符籙以彰聖德」。上然其言，乃登壇受之。九年正月七日，謂弟子曰：「吾昨夢成公興召我於中嶽仙宮」。五月二十五日，果羽化，有青若煙出口中，至天半乃消，其體漸

縮。識者謂之尸解、降年八十四。至七月十五日，東郡沈猷採樂於嵩嶽頂，見謙之身作銀色，光明如日，由是知為仙人。

孫遊嶽²¹

先生姓孫名遊嶽，字穎達。東陽人，吳之裔也。幼而恭，長而和，其靜如淵，其氣如春，甄汰凡流，潛神希微。嘗步赤松澗縉雲堂，卜終焉之地。宋文帝太初中，簡寂先生至廬嶽，乃執籍事之，遂授三洞經法，及楊許二真人墨跡。其後茹芝卻粒，又專服穀仙丸六十七年，顏色精爽，²²久而愈少。²³暨簡寂羽化，還舊隱，研味真趣。至齊武帝永明二年，詔主興世館，由是奇逸之士，爭相趨赴。若孔德璋、劉孝標輩，皆結方外之好。雖常以病求歸，詔命未允。以七年五月中，忽沐浴安坐而終。門弟子數百人，惟陶弘景為入室，以三洞經及楊許墨跡，竭篋相付。後弘景因撰真誥行世。

嚴東²⁴

道士嚴東，不知何許人。年四十餘。齊高帝建元中，詣晉陵，依道士李景遊。〔東〕（嘗）自〔晦〕（悔）若愚：²⁵衣弊履穿，惟齋一瓢，亦無經書。及與之談論，〔則〕所造深微，²⁶而聲音清徹，聽者駭異。其為笑傲歌謠，和光混跡，時人皆知非常而欽尚

²¹【案】三洞群仙錄卷十六「遊嶽卻粒」條係刪節，歷世真仙體道通鑑卷二十四著錄，文全。

²²「顏色」三洞群仙錄作「顏采」。

²³「久而」三洞群仙錄作「老而」。

²⁴【案】三洞群仙錄卷十六「嚴東一瓢」條係刪節，歷世真仙體道通鑑卷二十八著錄，文全。

²⁵「東」「晦」據三洞群仙錄正。

²⁶「則」據三洞群仙錄補。

之。在晉陵五六年，一日將別，援筆註靈寶度人經，辭不停翰，窮日而終。乃入溧陽甌山中，後亦不知所在。

王靈輿²⁷

王靈輿者，九江道士，性和緩而勤於道，始居五老峰，夜有神人謂曰：「得道者各有其地，如植五穀於沙石中，則不能成，既有飛昇之骨，當得福地靈墟，可以變化，雖累德以為土地，積行以為羽翼，苟非其所，則魔壞其功，道無由冀矣」。靈輿問可棲者何地？曰：「朱陵之上峰，紫蓋之鄰岫，〔乃洞天福地也〕。²⁸ 可以沖天矣」。〔師從之〕，²⁹ 遂遷衡嶽中宮，凡一紀，功成，³⁰ 梁武帝天監十一年七月十三日，群仙下迎於壇所而昇天。

張如珍³¹³²

衡嶽九真觀在廟東十里，舊記云：「晉大康中，新野先生建」。梁武帝天監初，有如珍真人居之，張乃先生鄉人鄰也，幼而少語，淡泊不群，壯歲幽棲，而宿稟靈骨，遇神人降於岳室，傳明鏡洞鑑之道。曰：「夫燭物理者，天也；鑒物形者，道也。天之道以清，鏡之道以明。審而無差，形定於此，物應於彼。故川嶽之狀，鬼神之情，無所逃而隱矣。天以清而容萬物，鏡以明而鑑眾

²⁷【案】三洞群仙錄卷七「靈輿福地」條係刪節，歷世真仙體道通鑑卷二十八著錄，文全。

²⁸「乃洞天福地也」據三洞群仙錄補。

²⁹「功成」據三洞群仙錄補。

³⁰「師從之」據三洞群仙錄補。

³¹【案】三洞群仙錄卷二十「道成始珍」條係刪節，歷世真仙體道通鑑卷三十三著錄，文全。

³²「如珍」三洞群仙錄作「始珍」。

形，若修天清鏡明澄心靜神而得內外洞徹，則至道成矣。倘外役於物，內勞於神，神心昏濁，不能澄清，則去道遠矣。此法，吾昔受之於長桑公子，長桑公子受之於太微天帝。君得之者，能洞達玄通，遐照八極。夫洞真法中，有四規之道，依四時而行，亦與此同體矣。古人所謂虛其室，白自生，定其心，道自至；信矣哉！如珍修之九年，³³ 徹視千里，無一物可隱。以梁天監十三年十一月十八日，獨行遊山，三日不反，弟子求之，見如珍方衣仙衣，駕雲輿，簫鼓擁之，縹渺而昇天。

侯楷³⁴

道士侯楷，字法先，³⁵ 京兆人也。年十四，力究經〔典〕，³⁶ 尤精老莊之學，趣向孤高，不畢婚宦，遂就學於正懿先生。年十九，後魏宣武正始中為道士，授玄文秘訣，晨夕之奉，久而愈勤。正懿曰：「汝雖秉心勵節，³⁷ 於道不懈，苟非栖隱山林，未易有得也」。楷曰：「道在方寸，何必山林」？曰：「吾亦知道無不在，然人間修之，時亦有得，但古來仙者，多託巖藪，成真之後，出而同塵。上真亦曰：大洞真經不得人間詠之。詠之則大魔敗之也。又葛仙翁將登真，別弟子鄭思遠云：何不登名山，誦大洞真經，一諷而一詠，玄音徹太清。由是知入山非惟不是可欲，抑亦自然與經道相符。汝今景慕希夷，入山乃其宜也」。曰：「入山雖可存真，然遠遠几席，寧道科律之責耶」？師嘉其言，且曰：「道非知之難，

³³ 「修之九年」下，三洞群仙錄作「道成，上補真人。於梁天監中白日昇天」。

³⁴ 【案】三洞群仙錄卷四「侯觀三松」條，及卷十一「侯楷同塵」條，均係刪節。歷世真仙體道通鑑卷三十著錄，文全。

³⁵ 「先」三洞群仙錄作「光」。

³⁶ 原作「與」誤，今正。

³⁷ 「秉」三洞群仙錄作「束」。

行之難也。果能始卒無替，道在中矣」。逮正懿羽化，乃卜居於寒谷，行三奔術，誦大洞經，及三皇內文劾召之法。其居有清泉環流，三松偃覆，灑然幽寂，是為栖真之所，遂號三松觀。人有為魑魅之害者，無有遠近，皆乞救於楷，或持之以禁咒，或示之以符術，則無不立除之。將去，無他疾，謂門弟子曰：「昔費長房失符，為鬼所殺，吾非失符也，終歸道真。苟世俗不達，以謂吾為長房者也」。春秋八十六，周武帝建德二年冬十月解化。

尹通³⁸

道士尹通者，字靈鑒，真人軌之後也。幼從儒學，群經子史，博無不覽。常嗟幻化非固，每仰天而歎，父母未之達，迫以婚宦，通乃跪伏曰：「切聞張真昇天，鎮南嗣美；茅君得道，太守投誠。況高祖太極真人之遺德，可無隆紹，願從所志」。父母許之，遂飄然而去。時天下寇難縱橫，通履艱危，冒驚險而至樓觀，年二十六。後魏太武始光，初事馬儉法師，服勤歷年，方授真人秘籙，玉字金書。及恃怙已失，孝禮既盡，而希真守一之心，與日俱●，香火朝謁，無或少怠。服黃精、雄黃、天門冬數十年，體漸清爽，性亦敏慧。尤急於療疾，可愈者治之，言不可者，決不可救。太武好道，欽聞其名，常遣使致香燭，俾之建齋行道。自是四方請謁不絕，而通惟以功德為懷，與而無求，散而無積。時有姪法興及牛文侯王道義與其徒七人繼踵而來，共希靈跡，故仙風真教自此復彰。年一百一歲，耳聰目明，尤能夜書。至孝文太和二十三年，夏四月八日，忽與門弟子為終天之別，有頃，奄忽而化，顏色如常。藏劍之久，老子昇真陵之西，有神燈數枚，光映其上，而後漸散。

³⁸【案】三洞群仙錄卷十七「尹失恃帖」條係刪節，歷世真仙體道通鑑卷三十著錄，文全。

嚴達³⁹

法師嚴達，字道通，扶風人也。自髫髻已有方外志，每得一花一果，輒羞獻於像前，樓觀侯法師，見而器之。後魏明元帝永興中入道，年始二十。齋真之暇，常請問大經，遂學窮瓊韞，博通妙術。周武帝建德中，詔法師及王延於便殿，是時已沙汰浮屠氏，又下議於公卿，復欲去道家者流。上問法師：「道與釋孰優」？曰：「主優而客劣。」上曰：「主客奚辯」？曰：「釋出西方，得非客乎？道出中夏，得非主乎」？上曰：「客既西歸，主無送耶」？曰：「客歸則有益胡土，主在則無損中華。去者不追，居者自保。又何送乎」？上嘉其對，然不免有所減損，自五嶽觀廟外悉廢之。特為法師建通道觀於田谷之左，復選樓觀之士十人，俾共弘真教。時王延更欲多得之，法師曰：「古之達者，先存諸己，而後存諸人。今上不欲廢道教，而意則去繁，但道貴得人，玄綱自振，何必多人耶？蓋多人則多累，反為吾道之玷。夫道不欲雜，雜則多，多則惑，惑則亂，亂則真理喪矣。詎有益哉」！遂與王延、蘇道標、程法明、周化生、王真微、史道樂、于長文、張法成、伏道崇等十人，以道術相忘，⁴⁰ 同乎出處，世號曰：「田谷十老」。至隋室，道教復振。文帝開皇中，詔重修二廟，精擇羽流，累置墨詞以祈景福，於是朝野宗奉焉。煬帝大業五年三月十七日，聽周法師鼓琴，乃曰：「琴聲感神，當有神降。更奏一曲吾聽之」。曲未徹，奄然返真。春秋九十一。

³⁹ 【案】三洞群仙錄卷八「田谷十老」條、卷十一「嚴議優劣」條，係刪節，歷世真仙體道通鑑卷三十著錄，文全。

⁴⁰ 「忘」三洞群仙錄作「忌」。

王道義⁴¹

道士王道義者，魏時人。博覽群書，兼明緯候。知終南有尹喜登真之所，後魏孝文帝太和中，自姑射山將門弟子六七人來居之。初，道士牛文侯尹靈鑒等四十餘人，敷弘道化，朝野欽奉，時歲歉，常住之資，殆不充給。道義大修觀宇，興土木工，丁匠就役，日常百數，而用度不乏，人訝而窺之，則倉庫皆備，取多而益不窮，咸知師之神化，陰有靈助。由是樓殿壇宇，一皆鼎新，惟秦始皇所造老子殿，以其宏麗，不加修飾。令門人購集真經萬餘卷，皆自捐己力，未始求於人。其性浩然無係累，室中常有人語，弟子輩潛●伺之，乃真仙之降會也。後魏宣武永平中，將反真之際，白雲滿室，異香盈庭，踰日方散。〔有白鹿臥於庭中旬日，或隱或見，既殯乃絕〕。⁴² 里人有見道義乘鹿而去〔矣〕。⁴³

陳寶熾⁴⁴

正懿先生陳寶熾，潁川人也。年二十一，不樂婚宦。後魏孝文太和十八年，隸籍樓觀，事法師王道義，未幾羽化，遂遊華陰，復遇陸景真人，授秘法而歸。於是端誠虛己，依按修持，及誦大洞經，久之通感，故珍禽奇獸，常來侍衛。每朝老子祠，及八節投龍簡，則白虎馴遶左右，導從●來。人或有惡意，則咆哮震奪，觸觀左之槐，使彼惡者驚畏自匿，人因號老虎木。其德感如此。通幽達冥，無所不至，事有未兆則先知。其崇妖害人，禁之立止。西魏文

⁴¹【案】三洞群仙錄卷三「道義馴鹿」條係刪節，歷世真仙體道通鑑卷三十著錄，文全。

⁴²「有白鹿臥於庭中旬日，或隱或見，既殯乃絕」。據三洞群仙錄補。

⁴³「而去」三洞群仙錄作「●天矣」，今據補「矣」。

⁴⁴【案】三洞群仙錄卷九「陳虎咆哮」條係刪節，歷世真仙體道通鑑卷三十著錄，文全。

帝欽異之，召入延英殿問道，時太師安定公及朝士大夫皆從而師之。年七十有六，大統十五年三月十七日，告門人曰：「吾昨夢仙官召，不果久留。來何為欣，去何為愴，生死道一，夢覺理均。爾等體之，無或悲矣」。言訖，奄忽而化。詔謚正懿先生。

于章⁴⁵

法師于章，字長文，右扶風人。年七歲，父母教讀孝經，數日，乃曰：「聞有道德經，意願習誦」。父母異之，隨其所好，令習于侯法師。至西魏大統九年披度，服巾瓶之勞，凡十有四載。法師愍之，為開三洞眾真要法，倒篋相付。嘗自謂曰：「真人符命，非俗可傳，今吾得之，固所寶也」。於是靜室圖寫雲篆龍章，精嚴其事，而施之於人，靡不神驗。適會詔選戒潔之士十人居通道觀，而師與焉。然常懷希真之心，期居幽寂。至周靜帝大象二年，遂卜觀之下西嶺下，誅茅累石，嘯詠林泉，餌黃精、茯苓、山地黃，又服氣吞符，飛章設醮，如此積勤，歷年無輟。隋文帝開皇十七年，復受皇化丈人太極真公六十甲子，及五帝、五嶽、符印，凡一百三十六首，並論天地源流，符之本末，置壇法式，乃錄授符日月，及真仙誥訣，次第訓之，名為起序。由是通真之心，與日俱進，故除妖剪崇，其神變不可量，而流俗霑惠，日益多矣。煬帝大業十年六月十四日羽化，春秋八十有二。臨窆之日，有一白鳥自棺而去，人謂得蛻形之道。

⁴⁵【案】三洞群仙錄卷「于章翦崇」條係刪節，歷世真仙體道通鑑卷三十著錄，文全。

牛文侯⁴⁶

道士牛文侯，隴西人也。性識穎拔，學洞古今，尤深於莊老。至於天文、地理，無微不綜。又善誨人，隨其性，導以忠孝，其勸戒則示罪福之理，其威禁則以符籙之科。由是法教重興，人多化惡為善。嘗為人講說，未始措意於利財，至於不得已，則受小而辭大。訪人貧乏，密遣致物於其家，欲人不知其所從來也。每冬寒，則布穀於地，使禽蟲有所食。陰功密惠，大以及於人，小以及於物。修身積德，久而愈篤。西魏文帝大統五年八月二十八日，夢青衣道童告云：「上帝有命，宜早治裝，明旦當發」。及覺，乃與門人別。翌日澡浴訖，果化。降年八十二。

王延⁴⁷

道士王延，字子元。扶風人也。纔九歲，好道。西魏孝文帝大統三年丁巳入道，師正懿先生陳寶熾。至十八，肆業於樓觀，與真人李順與相友善。未幾，訪華山雲臺觀，復師焦曠真人，授三洞秘訣真經。惟松餐澗飲，以希真理。後周武帝欽聞，乃遣使召之。焦真人謂曰：「道教陵夷，久失拯援，可應詔出，弘大道教。吾自此逝矣」！至都久之，得請還西嶽雲臺觀，復詔增修以居之。然山石無土，致之極勞，因虛默禱于天，忽涌土出於觀側，取多而不竭。嘗苦乏油，乃置一器，經夕自滿，久用而有餘。凡賓客將至，則先有二青鳥，其狀如鳥，飛鳴報之。每登仙掌，陟蓮峰，如履平地。居常出處，有猛虎馴遶，若相保衛。是時，天下溺於浮屠氏，且其

⁴⁶【案】三洞群仙錄卷十四「文侯布穀」條係刪節，歷世真仙體道通鑑卷三十著錄，文全。

⁴⁷【案】三洞群仙錄卷六「玉器自滿」條，及「松餐澗飲」條，皆係刪節。歷世真仙體道通鑑卷三十著錄，文全。

徒不能維持禪律之學，務以罪福駭俗，其弊浸盛，故行沙汰，道教亦從而幾絕。時師之名，獨為上所欽，召至闕，咨問道要，復欲建通道觀，命校●三洞經、法科儀、戒律、飛符籙，凡八十餘卷。又撰三洞珠囊七卷，詔頒於通道觀。由是道教復興，朝廷以大象紀號。至隋文帝禪位，置玄都觀，詔延主之。開皇六年丙午，特召見於大興殿，上齋誠，受智慧大戒。於是祥風景雲，羅覆壇所，因職以道門威儀。威儀之名，自茲始矣。時公卿大夫翕然欽附。仁壽四年春三月吉日，告門人曰：「吾欲歸西嶽，但恐上未許」。至九日，羽化於仙都觀。有白鶴飛鳴，徘徊庭戶。上異之，遣使護葬西嶽，及就壙，但空棺而已。

張法樂⁴⁸

道士張法樂者，南陽人。幼而學道，性悅泉石，纔及成童之年，託跡樓觀，事尹起法師，竭誠致力於左右，積有歲月，感其勤苦，遂付道要，露盟之夕，神燈發輝，慶雲流彩，而後巾瓶之奉，几案之勞，禮盡始末。遂尋幽訪奇，卜居於耿谷之西。衣弊茹蔬，謝絕人事，日誦五千文，及修雌一之道，煉形養●，抱一守真，凡三十載，雲生梁棟，霞集●扉，⁴⁹人號為雲居觀。⁵⁰久而道業已著，靈感自通，有虎踞蹶震，視之而不畏，後乃●來馴伏，似有所衛。人或請謁，褻慢無誠心，則皆為所逼而不得至。旦夕常聞有神鐘聲，隱隱於耳，然莫測其遠近。每齋日，有草衣人二十許，常送薰陸香及乾棗數枚，出戶襲視之，遂不見。西魏廢帝三年三月，謂弟子張通曰：「我雖幽感，奈功德未就，近有神告，必不久留，

⁴⁸【案】三洞群仙錄卷十「法樂霞擁」條係刪節。歷世真仙體道通鑑卷三十著錄，文全。

⁴⁹「集」三洞群仙錄作「擁」

⁵⁰「人號」三洞群仙錄作「自號」。

當委形厚土二百餘年。冥事貴密，汝可略知」。至四月十五日清旦，●几而化。時有白●如雲，穿牖而出，長丈餘，食頃方散。

田仕文⁵¹

田法師名仕文，右鄆人也。隋文帝開皇七年，試業入道，事韋節法師，傳授三洞經法及符訣，又誦靈寶生神章二經。居常餌服白朮、茯苓，久而有益。每煉氣於靜室，或一旬半月而出，顏色愈光澤。凡八節十直，庚申日，齋戒修奉，未嘗少輟。為人祈福，無不通感，或為人救病，⁵² 無不平愈。陳綱〔嘗〕（常）請〔作〕醮，⁵³ 忽〔神〕（袖）降棗數顆在壇，⁵⁴ 食之，則非人間所有者。

⁵¹【案】三洞群仙錄卷八「田師降棗」條係刪節，歷世真仙體道通鑑卷二十九著錄，文全。文末「又道士尹漆」。為引高道傳之又一篇，今析為二。

⁵²「嘗」「作」據三洞群仙錄補正。

⁵³「神」據三洞群仙錄正。

⁵⁴同上。

高道傳卷二

宋賈善翔撰 嚴一萍輯校

劉道合⁵⁵

劉道合者，一名愛道，陳宛丘人也。幼懷隱逸志，住壽春安陽山。隋末，遷蘇山，從仙堂觀道士孟詵傳道，復入霍山。春分日啟誓文於谷中，返數里間，雷電而雨，遂止於巖。是夕，夢有人召，覺則恍然有光，見一神人，身長丈餘，衣冠劍佩持符，從介甲士六七人，謂道合曰：「吾為黃神大威使者，今六天醜類，賊害民物，聞子好道，志節不屈，可制魔群，吾以三天正一盟威攝召符契授子」。道合受而吞之，自是道法所施無不驗。唐高祖武德中，入嵩山與潘師正同居，高宗聞之，降詔於所隱立太一觀使居之。時將封泰山，雨不止，帝使道合禳咒，俄霽。得寵賜，●散貧乏。洛邑苦飛蝗，道合以符示官吏，俾散貼境內則立消。唐高宗咸亨中，上召作符，既成未克進，忽料簡書汲汲然似有行意，弟子問之，則曰：「廬山司命君召吾」。有頃，沐浴具冠褐而化。調露中，創奉天

⁵⁵【案】三洞群仙錄卷十八「道合蝗消」條係刪節，歷世真仙體道通鑑卷二十九著錄，文全。

宮，遷道合墓，發棺見骸骨拆若蟬蛻者。帝聞之曰：「為我合丹，而乃自服去耶」？

巨國珍⁵⁶

巨法師名國珍，武功人。性淳厚，好神仙學。年三十，斷俗緣而事游法師於樓觀，時隋文帝仁壽之四年也。焚修之外，口必誦經，心常存一，名利兩忘，喜怒俱遣。食蔬，衣弊，所守彌篤。或有遺物者，隨得隨散，或有輕侮者，終不恚怒。法師嘉其行，乃授以思微戒錄，封召符章，依按而修，勤亦備至。每臨壇誦經遍，未及數則，雖冬風夏日，未嘗輒廢。一日，因感疾，人勉之以藥，曰：「道勝則疾除，何慮之有」？其自信之如此。由是遠近之俗，嚮往而至，不可勝計。春秋六十，唐太宗貞觀八年夏五月十三日，晝寢，門人忽聞車馬之聲，有頃，瓦屋皆震，法師遂化。

張果⁵⁷

張果隱於恆州條山，往來汾晉間，時人傳：果有長生秘錄。耆老云：為兒童時，人見之已言數百歲。常乘一白驢，日行數萬里。休則疊之，其厚如紙，置於巾箱中。乘則以水喂之，復成驢矣。唐太宗高宗徵之不起，則天皇后召之出山，佯死於●女廟前，時方炎暑，須臾臭爛生蟲，於是則天信其死矣。後有人於恆州山中復見之。開元二十三年，明皇詔通事舍人裴晤馳驛於恆州迎之，果對晤

⁵⁶【案】三洞群仙錄卷六「國珍晝寢」條係刪節，歷世真仙體道通鑑卷三十著錄全。

⁵⁷【案】三洞群仙錄卷十「銅牌誌鹿」條，卷十五「張果紙驢」條，及類說卷二，高道傳「白驢」條「白蝙蝠精」條，均係刪節，歷世真仙體道通鑑卷三十七著錄，文全。

氣絕而死。晤乃焚香，宣天子求遊之意，俄頃漸蘇。晤不敢逼，馳還奏之。乃命中書舍人徐嶠，通事舍人盧重玄，齋璽書迎果，果隨嶠到東京，於集賢院安置，肩輿入宮，備加禮敬，公卿皆往拜謁。帝問神仙？不答。善息氣，能累日不食。數飲酒，上賜之酒，辭以：小臣飲不過二升，有一弟子可飲一斗。明皇聞之喜，令召之，俄頃一小道士自殿簷飛下，年可十六七，美姿容，旨趣雅淡，謁見上，言辭清爽，禮貌臻備；明皇命坐，果曰：「弟子當侍立於側，不可賜坐」。明皇愈喜，賜酒，飲及一斗不醉。果辭曰：「不可更賜，過度必有所失，致龍顏一笑爾」。明皇又逼賜之，酒忽從頂湧出，冠子撲落地，化為榼蓋，上及嬪御皆驚笑，視之失道士矣。但金榼在地覆之，榼貯一斗酒，驗之乃集賢院中榼也。累試仙術，不可窮紀。果嘗云：「我生堯丙子歲，位侍中」。其貌若六七十許。邢和璞者，善知人夭壽，帥夜光者，善視鬼。帝令和璞推果壽，則懵然莫知。密使夜光視之，不見果所在。帝謂高力士曰：「吾聞飲堇而無苦者，奇士也」。時天寒，因取以飲果，三進頽然，曰：「非佳酒也」。乃寢頃，視齒焦縮，顧左右取鐵如意擊墮之，藏帶中，出藥付其齒，良久齒復生，粲然駢潔。上狩咸陽，獲一大鹿，令庖人欲烹之。果曰：「此仙鹿也，已滿千歲。昔漢武元狩五年，臣曾侍從畋于上林，獲此鹿，乃放之」。上曰：「鹿多矣，時遷代變，豈不為獵者所獲乎」？果曰：「武帝放之時，以銅牌誌于左角下」。遂命驗之，果有銅牌二寸許，但文字凋暗爾。上曰：「元狩是何甲子，至此凡幾年」？果曰：「是歲癸亥，武帝始開崑明池。今甲戌歲八百五十二年矣」。上命太史校其曆，略無差焉。上問葉法善曰：「果何人也」？答曰：「臣知之，然臣言之即死，今不敢言；若陛下免冠跣足救臣，臣即得活」。上許之。法善曰：「混沌初分白蝙蝠精」。言訖，七竅流血，僵仆於地上。上遽詣果所，免冠跣足，自稱其罪。果徐曰：「此兒多口過，不責之，恐泄天地之機爾」。上復哀懇久之，果以水噴其面，法善即期復生，帝益神

之，詔圖形集賢院，下詔曰：「恆州張果先生，遊方之外者也。跡先高尚，心入杳冥，是混光塵。應召至闕，莫知甲子之數，且謂羲皇上人。問以道樞，盡會宗極。今則將行朝禮，爰升寵命，可銀青光祿大夫，號通玄先生」。果屢陳老病，乞歸恆州，賜絹三百疋，隨從弟子二人，給驛肩舁，到恆州，弟子一人放回，一人相隨入山。天寶初，明皇遣徵詔，果聞示卒，弟子葬之。後發之，但空棺而已。帝為立棲霞觀。

雙襲祖⁵⁸

道士雙襲祖，字仲遠，梁時吳人也。始居南嶽，後遷九疑山。潛心於道，以求度世。嘗謂誠素所至，高真必通，遂刻志誦黃庭玉篇，因作黃庭觀，使弟子居之，自棲於白馬巖。一日歸觀，沐浴閉室而坐，凡七日不出。弟子驚異，開視之，忽然輕舉〔而昇〕，⁵⁹遺仙輅於木杪。時唐太宗貞觀元年夏四月也。巖中臥席，後百餘年皆不壞。

尹漆⁶⁰

道士尹漆，一日，令佩符籙函，忽墜水，驕然有聲，漆已在岸。其真籙神符之靈，皆此類。常語人曰：「世之人有苦，必援之」。然未之信。時有里人賀蘭開者，受戒於師，一夕忽卒，為鬼吏所執，至一府庭如人間有司之所，掌簿者閱之，謂開曰：「汝有

⁵⁸【案】三洞群仙錄卷十一「襲祖輕舉」條係刪節，歷世真仙體道通鑑卷二十八著錄，文全。

⁵⁹「而昇」據三洞群仙錄補。

⁶⁰【案】歷世真仙體道通鑑「田仕文」條後續「又道士尹漆云云」，當屬高道傳文之另一條，抄錄時未加分別，今改正為獨立一篇。

受戒之名，可復還」。由是重蘇。其通幽達冥之效如此。四方之際，信尚者多，而受賜不可勝紀。唐太宗貞觀十七年六月十九日羽化，人皆見旛花羽節，迎師而去。且曰：「吾今登南宮福堂矣」。降年七十有五，門弟子惟尹文操為入室者。

張公弼⁶¹

有劉法師者，不詳其名。唐太宗貞觀中，居華陰雲臺觀，煉氣絕粒二十年。每歲三元齋，有一人衣縫掖衣，貌陋而黔，來居坐末，齋畢亦無言而去，如此凡十餘年，衣服顏色累不改。法師異而問之？則曰：「予姓張名公弼，住蓮華峰東北隅」。法師意彼無人所居，試問同往，公弼諾之。曰：「此中甚樂，師能住，亦無間」。法師從之，約二十餘里，援蘿攀葛，纔有鳥徑，其崖谷險絕，雖猿狖不過，履之若夷途，法師從行，亦無難苦。至一石壁，高千餘仞，下臨無底之谷，一徑闊數寸，惟側足而立。公弼以指扣石壁，中有人問為誰？曰：「某」！遂忽然開一門，有天地森羅萬象。公弼將法師欲入，其人怒為公弼曰：「何故引外人來」？乃闔門，則又成石壁矣。公弼曰：「此非他人，乃雲臺觀劉法師，與吾有舊，故同來」。即開門而納之。公弼曰：「法師來此，君可具食」。其人問法師便住否？法師請以後期。遂取一盂水，以肘後青囊中刀圭粉和之以飲法師，其味甘且香。公弼曰：「予嘗云山中甚樂，君盍為戲，令法師觀之」！其人乃以水噴東谷中，俄有蒼龍白象各一對舞，舞甚妙。丹鳳青鸞各一對歌，歌甚清。公弼與法師別之，出門行數十步，返顧，但巨崖深壑而已。將及觀，公弼辭去，

⁶¹【案】三洞群仙錄卷五「公弼石壁」條係刪節，歷世真仙體道通鑑卷三十一著錄，文全。

法師歸，處置畢，再訪公弼，則步步險阻，不可前。其後公弼亦不復至矣。

韋善俊⁶²

韋善俊者，其先出京兆。高祖逍遙不仕，祖宣敏嘗為鞏縣令，因家於鞏，父昂，好山水。母王氏，初妊每嗽血食，則連夕腹痛，遂蔬食。既生，年十三歲，長齋誦道德度人西昇昇玄等經。人有所惠，悉為賑救之用。及壯，詣嵩陽觀事黃元籙，參佩道法；又從臨汝洞元觀道士韓元最，復授秘要，常有二青童侍左右。唐高宗調露初，有劉文兒過山之西，見神人長丈餘，介甲而坐，見善俊來，起迎之。文兒因訪識者，曰：「此奉戒道之士也」。文兒欽異，遂從善俊歸嵩陽。天后嗣聖中，寓籍昇仙觀。一日，復見神人厲聲曰：「子何人，●來此？請速去，不爾傷子」！善俊曰：「神人試我耶？何相逼太甚」！神人遂遜謝而去。又嘗過壇墟店東，遇黑駝犬繞旋不去，因畜之，呼為烏龍。如意中，將遊少林寺，以齋食食之。僧曰：「人未食而食犬可乎」？謝曰：「吾過矣」。尋出寺而去，望之愈遠而犬愈大，長數丈，化為龍，善俊乘之，歸嵩陽，絕跡不復出。長壽中，忽謂弟子曰：「吾學道已九十九年，今則百矣，太上召我當往」。遂乘龍去。

⁶²【案】三洞群仙錄卷五「善俊烏龍」條係刪節，歷世真仙體道通鑑卷三十六著錄，文全。

葉法善⁶³

葉法善字道元，處州括蒼人，世為道士。母留氏晝寢，夢流星入口，吞之有娠，十五月而生。七歲溺大江，三年而還。父母詢其故？曰：「青童引我飲以雲漿，復朝太上，故少留爾」。及冠，長九尺，性淳厚天然，不茹葷。遇青城趙元陽，授遁甲，嵩陽韋善俊授八史，由是自能厭劾鬼佐。因卜居卯西山，有巨石當路，行者迂徑避之，遂投符，石自起。嘗遊白馬山石室中，遇三神人，皆錦衣寶冠，謂法善曰：「我奉太上命，以密旨告子，子乃太極紫微左仙卿，以校錄不勤，謫於人世，速宜立功，濟人佐國，當復元任。今以正一三五之法（今）授於子，宜勉而行之」。言訖而去。而後滅妖凶，靡所不驗。唐高宗聞之，故寵以官，不拜，請度為道士，留內齋，禮賜予甚厚。時帝悉召方士化黃金治丹，法善上言：「丹不遽就，徒費財與日，請覈真偽」。帝然之，凡百餘人皆罷。嘗在東都凌空祠為壇以祭，都人悉往觀，有數十人自奔火中，眾大驚，救而方免。法善笑曰：「此為魅所憑，吾法攝之爾」。詢之果然，病亦皆愈。歷高宗中宗朝五十年，往來山中，時時召入。惟不愛浮屠法，常力詆之，議者淺其好憎，然以術高，卒莫之測。中宗景龍四年三月九日，三神人復降傳太上命云：「汝當輔我睿宗及開元帝」。曰：「未可隱跡山岩，以曠委任」。時二帝未立，而廟號年號已先知之，所以於睿宗明皇陰有助。土蕃進寶函，封題曰：「請陛下自開，無令人知」。法善奏曰：「此不祥也，宜令蕃使自開之」。既開，果有弩箭自函而發，中蕃使而死。睿宗先天中，拜鴻臚卿員外，置越國公，舍景龍觀。祖國重，諡有道先生，父惠明，贈歙州刺史，寵映當世。時僚庶受錄者，不可勝數。叔祖靖能

⁶³【案】三洞群仙錄卷五「法善龍輦」條，及卷十五「雲漿元道」條，均係刪節，歷世真仙體道通鑑卷三十九著錄，文全。

有道術，仍善屬文。高祖時直翰林為國子祭酒。汝陽王嘗飲靖能，靖能曰：「有生徒能飲，當令上謁」。翌日有通謁者曰：「道士常持滿」。見之，侏儒也，談胚渾之道。飲以酒，至五斗許，忽醉倒，乃一甕也。錢塘有巨屋溺舟，經涉者苦之，法善以符投水，其屋自斃。開元初，明皇以元夕觀燈於上元陽宮，謂無如此之盛。法善曰：「西涼府令夕之燈，亦可亞」。明皇異之，求往，則俾合目，頃刻而至。因以鐵如意賞酒，翌日，遣使求之，果在。又中秋夜與上遊月宮，聞天樂，問其名？曰：「紫雲曲」。上素曉音律，默記之，遂著樂府，更名曰：「霓裳羽衣曲」。時月宮還過潞州，俯視城郭悄然，但月色如畫，法善取玉笛請上奏一曲，仍投金錢于城中。僅旬浹，潞州奏：中秋夜有天樂臨城，兼獲金錢以進。師居四明之下，天台之東數年，忽於五月一日，有一老叟詣門，號泣求救。門人謂其有疾，白于師，引而問之？曰：「某東海之龍也，天帝●我守八海之寶，一千年一更，任無過者，則籍于仙品。某已九百七十年矣，微勳垂成。近有波羅門逞幻術，居于海岸，晨夕禁咒，積三十年法將成，五月五日海告竭矣。其統天鎮海之寶，上帝制靈之物，必為波羅門所收。至日，乞以丹符相救」。師既飛符，海水復舊，其人愧嘆，赴海水而死。翌日，龍輦寶貨以謝師，師曰：「林野棲神之所，珠璣寶貨，無所用之」。遂不受，謂龍曰：「岩石之上，去水稍遠，若致一清泉，即為佳惠爾」。是夕，聞瀟瀟風雨聲，達旦，繞山齋石渠，泉水環流，至今謂之天師渠。燕國公張說常與師會飲，師曰：「此有麴處士，性謹而訥，頗●酒，鍾石可也」。召至，其形侏儒，腰數圍，拜揖之禮頗樸拙，酒至●盡，而神色不動。師忽叱之曰：「曾無高談雅論，惟務●酒，何所用哉」？因扶之，乃一巨槥爾。至開元八年尸解于景龍觀。或言生隋大業丙子，卒壬戌，蓋百有七歲。解化之後，明皇思之，降制曰：「故道士具官葉某，天真精密，妙理幽暢，包括秘要，發揮靈符，固以冥默難言，希夷罕測，而情棲蓬閣，跡混朝伍。保黃冠而

不拔，加紫紱以非榮，卓爾孤芳，冷然獨往。勝氣絕俗，貞風無塵，金骨外聳，珠光內映。斯乃體應中仙，名升上德。朕嘗聽政之暇，屈詢至道，公以理國之法，屢奏昌言；謀參隱諷，事宜洪益。嘆徽音之未泯，悲縣解而俄留。何莫●遺，殲良奄及；永惟平昔，感愴予懷！宜申禮命，式賁泉壤。可贈越州都督」。●葬于松陽，百官縞素，泣送國門之外。仍度其姪潤州司馬為道士。師有弟子百餘人，惟暨齊物尹愔為入室矣。

張氲⁶⁴

張氲，晉州神山縣人。一名蘊，字藏真。父居欽，母楊氏，感黑光而娠十有八月，乃生於唐高宗永徽四年四月十六日。身長七尺五寸，風神秀逸，志性脩閑，眉目如畫，語言若鐘。工琴書，善長嘯，好黃老方士之說。父死有欲以女妻之，即棄去。曰：「吾慕古洪崖仙人」。遂自號洪崖子。游青蓋山，遇褐衣老人曰：「此岩景成子，汝師也」。如其言訪之，有被髮卉服，踞盤石者，氲再拜，景成子曰：「誰遣汝來」？氲具道老人語，遂盡傳其方。又曰：「姑射之南有古洞，汝當居之。若得五藥童役之，則仙去」。遂往姑射，有神人指洞所，果得五童，曰：「橘、栗、木、葛、枳」。役使左右。隱洞中十五年，仙書秘典，九經百氏，靡所不通。有樵夫竄而嘆者，氲酌杯水覆之石上，視之錢也，往●獲之。書生劉會怪之與俱來，失氲所在。氲常乘青驢，從五童入靈夏，訪崑崙，游終南泰華，往來青城、王屋、太行之間，與葉、羅二天師為侶。每究金丹華池之事，易形煉化之術，人莫能究其妙。聖曆中，武后召之不至。嘗醉臥洞口，酒欲醒，髣●見神人長丈餘，形甚偉，衣冠

⁶⁴【案】三洞群仙錄卷七「洪崖巢由」條係刪節，歷世真仙體道通鑑卷四十一著錄，文全。

儼然，指之曰：「子何不學大隱」？曰：「何謂大隱」？神人曰：「九衢三市，稠人翕然，諠譁於前」。復問曰：「何謂小隱」？神人曰：「獨臥林泉，曠然自適。昔夷齊居首陽，是曰小隱。耽伏混世俗，是曰大隱」。氾稽首從命，而神人忽隱。已而寓洛陽給事李嶠家，凡十三年，詞人逸客，爭相求見。明皇開元七年，屢召辭不獲，乃來見於湛露殿。上問曰：「先生善長嘯，如何得聞」？於是應聲而發，則幽韻蕭蕭，清人心耳。上曰：「朕何如堯帝？先生何似許由」？曰：「陛下道超堯帝，臣則德謝許由。昔堯帝召許由而不至，今陛下召臣而臣來」。上嘉之，拜氾太常卿，累遷至司徒，皆不受。曰：「陛下何惜一山一水，不令臣追跡巢由」？是歲八月聽還山。氾嘗在禁中指白驢云：「此乃千歲雪精也」。因賜之。詔本州葺其孝義里居，名其鄉曰：洪崖，里曰：徵君。仍賜牧驢草地於汾水。邠王守禮嘗問曰：「淮南雞犬皆仙去，有之乎」？氾曰：「學道求仙，如同睡異夢，父子夫婦莫相及也」。守禮曰：「神丹可餌，黃金可成乎」？氾曰：「富貴聲色，伐性之斧，點化烹煉，夭命之斤，草木金石，腐腸之藥，不可學也」。守禮曰：「我輩非仙材邪」？氾曰：「毋勞汝形，毋搖汝精，恬淡寡慾，可以久生，可以盡年」。守禮曰：「謹奉教」！氾雅好古物，時天下名賢往往有所贈。開國公李太一遺書曰：「僕聞先生有好古之癖，欽仰之久，近有張生者，晉司馬華九世孫，不遠千里以孔子木履一枚見遺。云：傳寶已二百年。觀其先聖所踐之物，非敢匿之，是用馳獻」。太子洗馬田遊岩贈尹喜龜、王戎如意杖。侍御史郭翰贈王烈石髓，孔子二儀履。楊●贈孔子石硯，楊雄鐵硯。僧惟恭贈筇竹杖。楊齊哲贈嵇康鍛鎚，陳平和階元亭贈謝靈運鬚數莖。僧智遠贈蔡邕焦尾琴、葛洪刮〔藥〕（樂）篋。⁶⁵ 僧脩然贈迦葉陀頭●。秦休莊贈河上公註五千言草本。劉守章贈四皓鹿角枕。司馬子微贈淮

⁶⁵三洞群仙錄之末，有此一段，今補之。

南王藥臼杵。周子恭贈古帝王圖一卷。節度使張守珪贈海蝦蟆牙。長一尺八寸。魏肅贈陶潛鳴琴、芙蓉冠。劉長新贈王喬笙。氾覽入山絕粒服氣，隱姑射山不復出。久之，河東巡撫使李嗣真與晉牧郭正一往姑射尋之，數日，方遇於松下，戴角巾，披鹿裘而臥。乃曰：「朝客何用逼野人乎」？二子嘆曰：「真高士巢由之輩也」。嘗註老子周易三禮穀梁，又著高士傳十卷，神仙記二十卷，河東記三十卷，大周昌言十卷，皆未行世。十六年，洪州大疫，有狂道人跨驢從五童施藥市中，病者立愈。州以上聞，上意其氾，驛召之，果氾也。然三召，卒不至。乃栖息於洪崖先生之古壇，出入跨雪精，常服烏方帽、紅蕉衣、黑犀帶、短鞞靴，五童分執六角扇，鐵如意、筇竹杖、長盈壺、常滿杯、文榴酒榼、自然榴杓，往來城市，酣笑自若，人莫知其所言。二十五年，范陽人得二大牙，皆一尺八寸，以獻上，上遣使就問，氾答曰：「頃見崑崙之下，有蝦蟆大者踰百尺，殆是邪」？天寶四載，年九十三，以四月八日黎明大霧，尸解榻上。郡人見其從五童冉冉上騰而去。是歲八月，復於晉州與里人劇飲，留衣履為別。至六日，尸解騰去，亦如之。晉人藏其蛻於北源。祿山之亂，以靈響助肅宗，乾元中，因申泰芝言豫章伏龍山有異氣，詔立應聖宮，塑肅宗像，以先生配焉。今紫清宮是也。德宗時，繼於晉州即其宅立廟。又於洪崖山尸解處，立廟祀之，今皆為棲真觀。氾有詩三章傳于世，其一曰：「去歲無田種，今春乏酒材。從他花鳥笑，佯醉臥樓臺」。其二曰：「下調人無睬，高心又被瞋。不知時俗意，教我若為人」。其三曰：「入市非求利，過朝不為名。有時陪俗物，相伴且營營」。今自豫章水西，沿洄數里，至隋唐西昌縣，故此數百武間，為小石頭，有石磯曰：洪崖釣臺，有石池曰：洪崖硯池。相傳為氾書堂處。蓋氾來豫章十

八年，舊跡可考僅如此。〔豫章記云：「隋開皇改為洪州，以先所居山名而名之」〕⁶⁶。

司馬承禎⁶⁷

後周瑯琊公司馬裔玄孫名承禎，字子微，洛州溫人也。事潘師正，傳辟穀導引術無不通，師正異之，曰：「我得陶隱居正一法，逮汝四世矣」。久之，辭几席，●遊名山，廬天台，構層軒於壇上，目為眾妙臺。唐武后嘗召之，未幾去，與陳子昂、盧藏用、宋之問、王適、畢構、李白、孟浩然、王維、賀知章為仙宗十友。睿宗復命其兄承禕就之，詔曰：「鍊師德超河上，逍遙浮丘。高游碧落之庭，獨步清源之境。朕初登寶位，久藉徽猷，雖堯帝丕圖，翹心齧缺，軒皇御曆，遠想崆峒。緬惟彼懷，寧妨此顧，朝欽夕佇，跡滯心飛。欲遣使者專迎，或慮鍊師嘉遯。故令禕往，願與同來，披遂不延，先此毋慮」。既至，引入中掖，延問其術，對曰：「為道日損，損之又損，以至於無為。夫心目所知見，每損之尚不能已，況攻異端而增智慮哉」？帝曰：「治身則爾，治國若何」？對曰：「國猶身也，故游心於淡，合氣於漠，與物自然而無容私焉，則天下治」。帝嘆詠曰：「廣成之言，何以加此」？賜寶琴霞帔以還。公卿賦詩送之，常恆、徐彥垣總而為之序曰：白雲記。後復遣使迎至京師，親授符籙，賞賜甚厚，每固辭請歸。盧藏用早隱終南山，後登朝，居要官，見承禎將還天台，藏用指終南山曰：「此中大有住處，何必天台」？對曰：「以僕觀之，乃仕宦之捷徑爾」。藏用有慚色。明皇詔於王屋山置壇室以居之。承禎善篆隸金剪刀書，自成一家體，帝命以三體寫老子，刊正文句。嘗鑄含象鑑、震

⁶⁶同上。

⁶⁷【案】類說卷二高道傳「小兒誦經聲」條係刪節，歷世真仙體道通鑑卷二十五著錄，文全。

景劍進之。命光祿卿韋滔至所居，按金籙設祠厚賜。上封泰山回，問承禎五嶽何神主之？對曰：「嶽者，山之巨鎮，而能出雲降雨，為國之望。然靈仙所隱，別有仙官主之」。於是詔五嶽別立仙宮廟。時女真焦靜真泛海詣蓬萊求師，至一山，見道者指言曰：「天台山司馬承禎，名在丹臺，身居赤城，真良師也」。靜真既還，詣承禎求度，未幾昇天。嘗降謂薛季昌曰：「先生得道，高於陶都水之任，當為東華上清真人」。開元中，文靖天師與承禎赴長生殿千秋節齋，直中夜行道畢，隔雲屏，各就枕斯須，忽聞小兒誦經聲，玲玲如金玉響，天師乃褰裳躡步而窺之，見承禎額上有小日如錢，光耀一席，逼而聽之，乃承禎腦中之聲也。天師退謂其徒曰：「黃庭經云：泥丸九真皆有房，方圓一寸處此中。又云：左神公子發神語。其先生之謂」。有弟子七十餘人。忽曰：「吾玉霄峰東望，蓬萊有靈真降駕，今為東海小青童君，東華君所召，必須往」。俄頃化去，如蟬脫蛻，弟子葬其衣冠焉。時年八十有九。詔贈銀青光祿大夫，諡正一先生。帝親文其碑，韋渠牟作傳，嘗撰修真秘旨、天地宮府圖、坐忘論、登真系等，行於世。

申元之⁶⁸

申元之者，不知何許人。游名山，博採方術，得內修度世之道。唐明皇開元中，召入上都開元觀，時張果、邢和璞、羅公遠、葉法善、尹愔、何思遠、史崇秘、□希言，同左佑真風，翼戴人主。帝游溫泉，幸東都，元之常扈從，善談清靜，上每延問，動移晷刻，惟貴妃與內人趙雲容侍晨宸，得聞其論。雲容嘗侍茶，乘間輒乞藥以希延生，元之曰：「我所惜，但汝不久世」。雲容復懇乞

⁶⁸【案】類說卷二高道傳「絳靈丹」條係刪節，歷世真仙體道通鑑卷三十九著錄，文全。

不已，元之愍其恭勤，乃與絳雲丹一粒，曰：「汝服此，死必不壞，但大其棺，廣其穴，含以珠玉，●而有風，使魂不蕩空，魄不淪淆，百年外可以復生。此太陰煉形之道，即為地仙。復百年，當還洞天矣」。雲容從幸東洛，病于蘭昌宮，特以元之之言問貴妃，上命中人陳元造如其所請而瘞之。至憲宗元和末已百年，雲容果再生。元之亦隱顯無常，自號田先生，識者相傳魏時人，已數百歲。

邢和璞⁶⁹

邢和璞，不知何許人。隱居瀛海間。善筭心術，凡人心之所計，布筭而知之。卜居嵩穎間，著穎陽書三篇，有筭心旋空之談，復能以法活死者。唐明皇開元十二年至都，朝貴候之，其門如市。有友人居白馬坡下，和璞至，死已踰日，當其母哀之，和璞遂置尸于●，引其衾同臥，閉戶良久，起具湯沐，而猶未甦，復與之寢，須臾即活。又崔司馬者與和璞善，因疾篤，曰：「先生何棄我耶」？已而聞寢壁有穿穴聲，窺之有微隙漸大，見導從數百人，一人紫衣大冠坐車中，謂崔曰：「邢先生合太乙相救」。言訖而去，其疾遂愈，隙穴亦尋失矣。房琯為桐廬宰，⁷⁰待和璞甚善。暇日因攜手出城，不覺行十數里，至夏谷村，有廢佛堂，松竹森映，共坐其下。和璞以杖擊地，令侍者掘之，深數尺得一瓦瓶，中有婁師德與永公書，和璞笑謂琯曰：「省此乎」？琯髣●〔記〕前世嘗為僧名永和，⁷¹璞曰：「君當為宰輔，善自愛。然其終必食鱸，棺以龜茲，不在私第，不在公館，不在寺宇，不在外家」。琯後果踐台輔，謫居閬州，臥疾紫極宮。稍愈，太守召會郡齋，進鱸，食畢疾

⁶⁹【案】三洞群仙錄卷三「和璞笑琯」條係刪節，歷世真仙體道通鑑卷三十九著錄，文全。

⁷⁰「桐廬」三洞群仙錄作「盧氏」。

⁷¹「紀」據三洞群仙錄補。

復作，夢神人曰：「邢真人之言，信矣」！翌日，果終。前有賈者，拖龜茲板為老君帳，因假以為棺。和璞廬終南，學道者多依之，時崔晤與其友恭事左右。一日，謂其徒曰：「旦夕有異客，子等為予設具」。又戒曰：「謹毋窺伺」！翌日，果一人至，其長五尺，闊三尺，首居其半。衣緋執笏，鼓髯大笑，吻角侵耳，作劇談，多非人間語。崔晤欲見不自〔止〕（正），⁷²遂趨而過。客熟視謂和璞曰：「此非泰山老師乎」？曰：「然」！食訖而去。和璞謂晤曰：「此上帝戲臣也。言泰山老師，子能省乎」？晤垂涕曰：「少聞先人言，〔某實〕（實）老師之後身，⁷³然前身不甚記」。和璞後亦不知所之。

趙惠宗⁷⁴

道士趙惠宗者，硤州宜都人。隸籍久之，得九天仙錄，三洞秘法，皆通曉。後居郭道山。唐明皇天寶末還硤，忽於郡之東北，積薪自焚，僚庶悉往觀之，惠宗怡然坐火中，誦度人經，斯須，化為瑞雲仙鶴而去。火既燼，其下草猶綠。得遺簡有請二首，其一曰：「生我於虛，置我於無。至精為神，元氣為軀。散陽為明，合陰為符。形為灰土，神與仙俱。眾垢將畢，萬事永除」。其二曰：「吾駕時馬，日月為衛，洞曜九霄，⁷⁵上謁天帝。明明我眾，及我門人，偽道養形，真道養神。懋哉！懋哉！餘無所陳」。

⁷² 「止」「實」依文理正。

⁷³ 同上。

⁷⁴ 【案】三洞群仙錄卷二「惠宗積薪」條係刪節，歷世真仙體道通鑑卷四十一著錄，文全。

⁷⁵ 「曜」三洞群仙錄作「躍」。

賀知章⁷⁶

賀知章字季真，越州永興人。性曠夷。初擢進士第，累遷賓客，授秘書監，晚節尤誕放。天寶初，病，夢遊帝居，數日寤，乃請為道士，還鄉里，詔許宅為千秋觀，又乞官湖為放生池，又詔賜鑑湖剡川一曲。既行，帝賜詩寵行，人比之為二 ●。

賀知章為秘書監，開元中，遇通和先生，授以丹，告之曰：「先盟而後授，然仙家品秩，如青紫階級，不可驟進，必以退節為首；退節則寡欲，寡欲則神逸，神逸則無為無不為。反此而求道，猶卻馬以追奔，子其志之」。知章後棄官，乞為道士。

李遐周⁷⁷

李遐周有道術，開元中，石入禁掖久之。天寶末，一旦遁去，但於所居壁上題詩識，祿山僭竊及幸濁之事，人莫能曉，而後皆有所驗。其末篇云：「燕市人皆去，函關馬不歸。若逢山下鬼，環上繫羅衣」。燕市人皆去者，假幽薊之眾而起也。函關馬不歸者，哥翰翰潼關之敗，疋馬不還也。若逢山下鬼者，即嵬字，馬嵬驛名也。環上繫羅衣者，貴妃小字玉環，馬嵬時，高力士以羅巾縊之。其所先見皆此類也。

⁷⁶【案】三洞群仙錄卷十四「賀乞鑑湖」條、又卷五「通和青紫」條著錄。

⁷⁷【案】三洞群仙錄卷十四「遐周詩識」條著錄。

成道士⁷⁸

成道士者，不知何許人，晦名隱跡。唐明皇開元末，中使謁金天廟，聞成真人之名，遽候之，有道士弊衣負布囊而來，詢其氏，曰：「姓成」。延於傳舍，問所習，不答。以騎與之，至成都，密奏之，明皇異其說，召入，館于蓬萊院，問道術及所修，皆不對。未幾，乞歸山，上允；乃挈布囊而去，人見皆笑之。而後因〔撤〕（徹）幙，⁷⁹ 壁上有題曰：「蜀路西行，燕師北至。本擬白日昇天，且看黑龍飲渭」。其字刮洗愈明，上聞之，亦莫知其意，不數月，果狩蜀。⁸⁰

傅仙宗⁸¹

練師傅仙宗，長安人。父倫資陽令。仙宗幼聰明而好道家學，年十二，隱資陽山。未幾有神人告：玉案山乃福地，可往修行。既至，建玄齡觀以居之；僅一紀，一日，又有介甲士數人告曰：「某主山神也，自師居此，身不遑安，況此未為修真之所，即州之西，有平岡山可居」。仙宗然其說，乘青驪赴平岡山，聞鬼神侍衛而至，建星壇靜室，創老君殿於其間。唐明皇詔赴闕。利州桔柏江，每年舟楫為水所害，仙宗抵其江，津人說其苦難，仙宗乃以二石板篆符投水中，翌日果有二大魚曝於灘，腹下有丹字曰：「赤鯉！赤鯉！生居河水，不避仙官，宜得其死」。刺史具以聞，詔立仙宗祠於其溪。已而至都，所對稱旨，命賜優厚。俾于上清宮設醮，上躬

⁷⁸【案】三洞群仙錄卷二十「成師挈囊」條係刪節，歷世真仙體道通鑑卷四十一著錄，文全。

⁷⁹「撤」據三洞群仙錄正。

⁸⁰三洞群仙錄作：「不數月，祿山起，明皇乃入蜀」。

⁸¹【案】三洞群仙錄卷十八「仙宗赤鯉」條係刪節，歷世真仙體道通鑑卷四十一著錄，文全。

詣之，仙宗拜請東方青帝青童從官將神及諸位列宿者，皆儼然來降。上恐懼，既罷，問卿修何道而致此？曰：「臣修道，務以安人利物，節食儉衣，守之以恬淡，行之以簡易，澄之不清，撓之不濁，以此自勝，故一切神靈應召而至」。又問金丹？曰：「金液之丹，未可使服，須功滿行圓，惠及民物，然後服之，即長生也」。上大悅。久之，乞還山，詔葺修舊觀，賜額為應真，上親書之；後亦遣使齋香燭，就設醮席不絕。唐肅宗乾元三年十月十四日，忽聞空中云：「太上有●」。乃索沐浴，遂登榻而化。邑人王念自成都還，道中見仙宗乘青驪入簡州去，而後亦莫知其所之。御史中丞宋渾撰碑。

吳筠⁸²

吳筠字正節，華陰人也。通經義，美文辭，舉進士不中。性高耿，不能與時俯仰。去居南陽，倚常山。唐明皇天寶初，召至京師，隸為道士籍。入嵩山，依潘師正究其術。南遊天台，觀滄海，與有名士相娛樂。文辭傳京師，明皇遣使召見大同殿，與語甚悅，●待詔翰林。獻玄綱論三篇。嘗問道？對曰：「深於道者，無如老子五千言」。復問神仙冶鍊法？對曰：「此野人事，積歲月求之，非人主宜留意」。筠每開陳，皆名教世務，以微言諷天子，天子重之。群沙門嫉其見遇，而高力士素事浮屠，共短筠於帝。筠亦以天下將不治，求還嵩山，詔為立館。未幾，漁陽事作，乃往茅山，復東入會稽剡中。嘗論谷神之妙，則有玄綱論；哀蓬心蒿目之遠於道，則有神仙可學論；疏淪澡雪，使無落吾事，則有洗心棲岩賦；修胸中之誠，而休乎天君，則有心目論、契神頌。至若遊仙、步

⁸²【案】三洞群仙錄卷十三「正節野人」條係刪節，歷世真仙體道通鑑卷三十七著錄，文全。

虛、王化、雜感之作，凡四百五十餘篇，禮部侍郎權得與集而為序。始筠見惡於力士而斥，故文章深詆釋氏。筠所喜孔巢父歌詩，略相甲乙。代宗大曆十三年於宣城道觀中，忽焚香返真。弟子邵冀元與其徒，葬天柱之西麓，私謚宗元先生。

程太虛⁸³

程太虛者，果州西充人。幼好道，節操不類於常人。年十五，登所居之東山，飄然有凌虛意，尋有五色雲霞擁其身，俄而天樂羽蓋，合沓而至。太虛默念未辭親友，忽雷震一聲，竟無所睹，退而刻志修誦愈勤。年十八，恃怙俱失，棄資產，居南岷山，絕粒坐忘，動逾歲月。有二虎侍左右，若備呼使，因名為善言、善行。乃撫背授以三歸之戒，〔二虎〕遂跪伏而聽，⁸⁴自是呼名則至。忽一夕，大風拔木，雷電而雨，砌下坎陷中，水如沸湧，因以杖擾之，得碧玉印兩鈕，每歲農人乞符籙祈年，以印印之，則授者愈豐阜。凡有得，以惠施之外，皆以構祠設像，無所私己。有女道士謝自然授法籙，印訖則密收之，一日失所在。唐德宗貞元十年，自然白日昇天。憲宗元和四年，太虛解化，五年二月遷神子玄宮，貌不變而輕若空衣。所化之地，忽生皂莢一本，柯葉下垂，俗謂之披頭莢皂。宣宗大中十年，有命使自峽入蜀，道由南岷，訪太虛之祠，謂其門人曰：「去年冬，過商山宿逆旅，出門見嶺上花木稍繁，忽忽躋石躡險，幾五六十步，至其下，異花夾道，約一里餘，有居第如公館，青童引入，見一道士，自云：『姓程名太虛，祖居西充，今憩此』。已而，留連極勤，厚囑曰：『明年君自蜀入岷，無忘訪我』。今熟視其像，果與見者無異」。

⁸³【案】三洞群仙錄卷七「程戒二虎」條係刪節，歷世真仙體道通鑑卷四十一著錄，文全。

⁸⁴「二虎」據三洞群仙錄補。

應夷節⁸⁵

應夷節字適中，汝南人也。唐明皇開元中，高士應凝之曾孫，累世不仕，窮道養性。母何氏夢流星入牖，驚覺，室有光，因而孕焉。既生不喜茹葷，年七歲，而性敏慧，詣蘭谿靈瑞觀吳尊師，受老莊文列，及周易。十三歲，與道士籍，持十戒，而勤焚誦。師友見之，肅如也。久之，遊天台龍虎山，受正一紫虛都功等籙，而後復受昇玄上清，迴車畢道，及紫文素帶，藉地騰天符。且上清大法，自陶隱居傳王遠如，王傳潘先生，潘傳司馬練師，司馬傳薛季昌，薛傳田良逸，田傳馮惟良，馮傳夷節也。師行之精謹，故動有神靈之默助。與葉藏質劉處靜為林泉友。唐武宗會昌中，就天台桐●觀之西南，別建淨壇以居。觀察使李褒，間來問道，因奏請院額，因詔以道元為名，拾遺張穎撰記。而栖真此地五十餘年，吳越之人，瞻風稽首，願侍巾几者，莫知其數。每人靜行道，登壇閱籙，或為人致福，數有感應。居常誦黃庭大洞二經。至於八道望雲、三元受事、迴風隱地、攀斗藏天之術，尤勤行之。時公卿以旰名聞奏，詔賜服號，固辭。嘗謂門弟子曰：「吾以維持教法，不能滅跡匿端。雖道不違人，而勤行方至，然玉京、金闕、泉曲、酆都相去幾何？唯心所召，爾等勉之」。昭宗乾寧中，忽一日沐浴入靜，凝神如有所待。至翌日昧爽解化。春秋八十有五。是夕，清香馥郁，猿鳥悲鳴。及遷神就窆，但空棺而已。東陽羅隱為贊。

⁸⁵【案】三洞群仙錄卷十一「應不茹葷」條係刪節，歷世真仙體道通鑑卷四十著錄，文全。

左元澤⁸⁶

道士左元澤，永嘉人也。賦性耿介，不俯仰於時。事方瀛徐靈府，因卜居香林峰石室中，去方瀛一里許，晨夕省奉，雖祁寒暑熱，未始不至。靈府愍其勤恪，遂授以秘要，後陟玉霄峰，有人設黃籙齋，元澤列簣，以草履登壇，或詰之，曰：「三境尚擬去，此何土堆也？」後歸松房，絕粒不語。忽攜一布囊，貯木屨古鑑入山，莫知其所止。或一月兩月，即出訪其友應夷節談論清虛。

（外）嘗言所居有一岩室，⁸⁷ 左右有大竹數十根，前有池，於曲渚中，有碧芙蓉數十朵。又有文禽數十隻，類鸕●，游泳其間。嘉其趣，因宿室中，至夜有物環其身，既覺，惟瞑目坐忘，達旦方解去。視其布褐，惟聞涎腥。是夕復坐室中，布〔綱〕（網）步以伺之，⁸⁸ 果一物自池中出，長數丈，兩目光射人，若蛟螭之狀，俯岩呵喻，徐而蹙縮入池。因戒曰：「後學輩無術，謹勿〔獨〕栖岩穴也」。⁸⁹ 溫州青障觀有土地，里人常以血食祀之，苟祀不至則為祟。元澤以杖笞神背三下，翌日，有大狸死于庭，背有杖痕者三。里人復夢神告曰：「託附吾者，為仙官笞死。謹勿〔以〕血食祀我也」。⁹⁰ 元澤一日忽謂主觀者曰：「某將他適，請置湯沐」。復祝之：「掩蓋日，但請隨香氣而去，盡處即止」。是夕，有風雨雷電交作，光中有兵衛皆介甲。將曉，聞唱珍重聲，往視之已化矣。遂襲香氣盡處，如其言瘞之，果得一自然石壙，不知其甲子。嘗製真一頌，題於方瀛石壁曰：「大道杳冥，不可致詰，含太虛為廣舍，

⁸⁶ 【案】三洞群仙錄卷九「元澤笞神」條及「左蛟蹙縮」條係刪節，歷世真仙體道通鑑卷四十著錄，文全。

⁸⁷ 「外」衍文。

⁸⁸ 「綱」三洞群仙錄作「網」。

⁸⁹ 「獨」據群仙錄補，又「謹」作「慎」。

⁹⁰ 「以」據群仙錄補。又「謹」作「慎」。

總萬宇于真一。以道守真，真亦非一，言之以自然，任之以萬物。胎根既斷，三界迴出，九祖得度，三官息筆。實賴無功之功，其功妙而難匹」。

高道傳卷三

宋賈善翔撰 嚴一萍輯校

薛季昌⁹¹

薛季昌者，河東人，家世皆以官顯。季昌自幼不好榮，不苟葷，衣常布素，酷好山水。一日，遊青城，遂南如桃源。後遇正一先生司馬承禎於南嶽，授三洞經籙，研真窮妙，勤久不懈，故高真屢降，異香妙樂，時聞於靜室中。唐明皇召入禁掖，延問道德，乃談極精微，上喜，恩寵優異。尋即還山，上命賦詩贈序曰：「練師志慕玄門，栖心南嶽，及登道錄，忽然來辭，願歸舊山，以守虛白。不違雅志，且重精修，若遇至人神藥，時來城闕也。詩曰：洞府修真客，衡陽念舊居。將成金闕要，願奉玉清書。雲路三天近，

⁹¹【案】三洞群仙錄卷十五「祝融召會」條係刪節，歷世真仙體道通鑑卷四十著錄，文全。

松溪萬籟虛。猶宜傳秘訣，來往候仙輿」。季昌嘗撰道德玄樞以總頤真妙注。九真降聖觀，復華蓋舊隱，修煉丹成。一日，忽謂弟子曰：「祝融峰令夕有天真之會，予被召當往」。遂凌虛而去，不復返。後建凌虛宮。

薛幽棲⁹²

薛幽棲，蒲州寶鼎人也。性沈靜，有敏識卓見，修舉業之暇，好聞方外事。唐明皇開元中及進士第，年始弱冠，調官陵郡尉。秩未滿，有林泉之興，遂拂衣去。服冠褐，出入青城峨嵋間。久之，遊鶴鳴山，訪漢天師治所，修行僅一紀，而道氣愈充。天寶初，復遊南嶽，卜棲真之地。乃晦其名氏於五老峰之下，遊心於自得之場，曠然無所係，而能和光混俗，毀方瓦合。其於三洞真誥，靡不該覽。故幽人逸客，嚮風稟受，日集于左右，而師辯論宏博，隨其根性，各有所發明。進玄微論三卷，上稱賞其達悟。未幾，尸解于墨山。嘗註靈寶度人經見行〔于〕世⁹³。

侯道華⁹⁴

侯道華自言峨嵋山來，泊於河中永樂縣道靜院，若風狂人，眾道士皆輕易之。又云：陝州芮城人，詣中條山道靖觀，事周尊師名悟仙，居常如風狂人。凡親舍有所損，自持〔斧〕斤補完之。⁹⁵ 登危立險，人所難及處皆到。又為事賤劣，有客來，不問道俗凡庶，

⁹²【案】三洞群仙錄卷十一「幽棲混俗」條係刪節，歷世真仙體道通鑑卷三十九著錄，文全。

⁹³「于」據三洞群仙錄補。

⁹⁴【案】三洞群仙錄節引兩段，一在卷三「道華登松」條，一在卷十「道華愚懵」條，均係刪節。歷世真仙體道通鑑卷三十六著錄，文全。

⁹⁵「斧」據三洞群仙錄補。

悉為擔水、汲湯、濯足、浣衣。又淘漚、灌園，辛苦備歷，以資於眾。眾益賤之，驅叱甚於僕隸，而道華愈忻然。又常好〔讀丹經〕子史，⁹⁶ 手不釋卷，一覽必誦之於口。眾或問之要此何為？答曰：「天上無愚懵仙人」。眾咸笑之。經十餘年，殿梁上或有神光，人每見之。相傳云：唐開元中，有劉天師嘗煉丹成，試犬，犬死，而人不敢服，藏之於殿梁，人皆謂妄言矣。因殿宇損壞，道華葺之，登梁，陷中得小金合，有丹，遂吞之，擲下其合。吞丹訖，遽無變動，忽一日，入市醉歸，其觀素有松樹，偃蓋甚為勝景，道華乃著木屐上樹，悉斫去松枝，群道士屢止之，不可，但斫曰：「他日●我上昇處」。眾人以為風狂，怒之且甚。適永樂縣令至，其吏人觀其斫松，深訝之，眾具白於官，官於是責辱之，道華亦忻然。後七日，道華晨起，沐浴妝飾焚香，曰：「我當有仙使來相迎」。但望空拜不已，眾猶未信；須臾，人言觀前松上有雲鶴盤旋，簫笙響亮。道華忽飛在松頂，坐久之，眾甚驚忙，永樂縣官、道俗、奔馳瞻禮。其責辱道華縣官，扣磕流血，道華揮手以謝。道華云：「我受玉皇詔，授仙臺郎，知上清宮善信院，今去矣」。復留一詩云：「帖●大還丹，多年色不移。前宵謾喫卻，⁹⁷ 今日碧空飛。慚愧深珍重，珍重鄧天師，昔年煉得藥，留著與內芝。吾師知此術，速鍊莫遲為。三清相對侍，大羅的有期」。俄頃，雲中音樂聲，幢旛隱隱，凌空而去。時唐宣宗大中五年也。鄭雲叟題中條道靖觀詩云：「松頂留衣上玉霄，永傳聖跡化中條。不知揖●諸仙否？豈累如今隔兩宵」。節度使鄭公光按視，以事聞奏，詔賜絹五百匹，並賜御衣，修飾殿廊，賜名昇仙院。

⁹⁶ 「讀丹經」據三洞群仙錄補。

⁹⁷ 「謾」三洞群仙錄作「盜」。

岐暉⁹⁸

法師岐暉，字平定。京兆人也。周武帝太和五年入道，未幾，會武帝沙汰釋老之徒，因復流俗。至隋，道法重興，時年二十六，景行之心愈固，遂事蘇法師於通道觀。久之，傳授三洞經法，修按未嘗少怠，內以希夷全其真，外以逍遙適其趣。歷年之久，湛然自得。隋大業七年，煬帝親駕征遼，暉謂門弟子曰：「天道將改，吾猶及見之，不過數歲矣」。或問曰：「不知來者若何」？曰：「當有老君子孫治世，此後吾教大興」。後數年，隋果亂。至唐高祖欽異其德，遣使齎龍綵以祈福醮，夕有白雲覆壇，雙鹿馴砌，其精感如此。上嘉之，詔修樓觀，壇宇尊像，一皆鼎新。仍以藍田充焚修之費，命師主之。一日，上躬詣祠庭，謂左右曰：「老君乃吾聖祖也，今為社稷主，不有洪建，其可已乎」？因改觀為宗聖，詔賜粟帛以充齋給。師每為國祈謝之外，修存三守一及臥斗之法。嘗以仙經云：「欲為仙客入太白」。於是擇門人志道者俱往，既至而返，則室中常有神仙談笑。唐太宗貞觀四年七月十八日，忽謂門人曰：「翌日巳時，吾當去世」。及期果羽化，春秋七十三。

劉知古⁹⁹

道士劉知古，字光玄。其先彭城沛人也。自中山靖王而下，凡十二世皆顯達，曾祖英，隋朝以孝廉登科，歷官臨邛令，故大父與其考，因家于臨邛。母太夫人吳氏，感異夢而生知古。生而慧，幼而明，長而秀，壯而正，視名利若仇讎，惟從事於道。唐高宗龍朔

⁹⁸【案】三洞群仙錄卷十八「岐暉返室」條係刪節，歷世真仙體道通鑑卷二十九著錄，文全。

⁹⁹【案】三洞群仙錄卷一「知古金魚」條係刪節，歷世真仙體道通鑑卷三十二著錄，文全。

中，出家為太清觀三洞道士；至於八公寶章，三簡秘錄，丹經脈訣之旨，出死入生之術，罔不洞曉。睿宗召見，問道家事稱旨，特加崇錫，送還山。明皇開元中，天災流行，疾疫者十有八九，上召知古治之，乃歎曰：「〔大德曰生〕（火德星君），¹⁰⁰〔至〕（聖）人亦〔病〕（癘），¹⁰¹下法煉藥，上醫察聲。至於鍼艾，不其遠矣」。遂以色代脈，用氣蠲痼，故能膏肓河決，腠理雪散，其精妙〔至〕（之）如此。¹⁰²上寵錫，皆不受。天寶十九年，詔知古兼內史田思崇醮二十四位。久之，乞還蜀，請以居第為大千秋觀，上親書額賜之，李邕文其碑。知古以兄為儒，弟為釋，因設三教像以事。燕國公張說聞其風而悅之，作三教銘，其辭曰：「正氣生神，結虛為實。上清尊帝，中黃守出。華彩衣裳，虛無宮室。紫●乘斗，赤鑪飲日。十天從此，萬靈受役。蓮華釋門，麟角儒術。法共不二，心同得一。道心惟微，守而忽失」。而後因天長節，改觀為天長。嘗有客授以黃白術，雖輦輦連攜，頗極壯麗，所費萬計，未嘗資於人。工畢，客復至，約於東陽伏牛山，其下有古觀，因葺而居之，又授神虎寶經，上清隱文，高奔上道之要，行之十年，忽然室中見有光，產丹芝一莖，扣之有金石之聲。夢神人謂曰：「後山石壁中有金魚，跨之可以沖天。非此芝扣石，不可致」。遲明訪金魚，茫然不知其所。是夕復夢曰：「滴泉之下是也」。既至，以芝扣，如風雷之震，巨石迸裂，得金魚長三尺許，乘之飛空，雲霧旋擁而去矣。

¹⁰⁰「大德曰生」據三洞群仙錄正。

¹⁰¹「至」「病」據三洞群仙錄正。

¹⁰²「至」據三洞群仙錄正。

徐左卿¹⁰³

徐左卿者，不知何許人。唐天寶十三年重陽日，明皇獵于沙苑，雲間有孤鶴徊翔，上親射之，其鶴帶箭而墜，將及地丈許，欻然矯翼首于西南，¹⁰⁴ 眾極目久之不見。益州城西十五里有道觀，其流非修習者，莫得居之；東廊第一院，尤為幽寂。左卿常自稱青城山道士，風格清古，一歲凡三四至觀，宿於德虛正堂，以俟其來，¹⁰⁵ 至則三五日或旬朔，言歸青城。甚為人所仰。一日，忽自外至，神采不怡，攜一箭謂人曰：「吾山中偶為此物所加，已無恙矣。然此箭非人〔間〕所有，越明年，箭主到此，當付之」。遂留於後壁，復題其時云：「十三載九月九日也」。明皇狩蜀，至觀，因幸道院，見其箭，命取閱之，即御箭爾。上驚異，詢之，道士以實對，即前歲沙苑中所射之鶴，乃徐左卿也。復覽其題，則又知當日自沙苑一翥而至此。後蜀人亦無復有遇左卿者。武興之東勤三十里，溪山可愛，而南北之峰峙然聳秀，名之曰飛仙嶺。耆舊相傳云：昔左卿帶流矢飛泊之所，今嶺之下有飛仙觀遺址存焉。宋仁宗皇祐中，北作訪使郭諮題云：「翠嶺標仙跡，雲間碧樹開。每聞岩鶴過，疑是羽衣來。絕嶠時飛石，寒潭忽起雷。必應苑中箭，猶寄在丹臺」。

¹⁰³ 【案】三洞群仙錄卷十三「沙苑矯翹」條係刪節，歷世真仙體道通鑑卷四十二著錄，文全。

¹⁰⁴ 三洞群仙錄作「倏然矯翹翥于東南」。

¹⁰⁵ 「一歲凡三四至觀，宿於德虛正堂，以俟其來」，中間似有脫文，姑如此斷句。

舒虛寂¹⁰⁶

舒虛寂字得真，開州人也。世業農，虛寂獨喜林泉，好黃老術，事建陽翟乾祐天師。天師嘗泝江游仙都觀，洞中得鎮光策靈書，乃葛稚川於羅浮山神仙降授之文也。乾祐謂虛寂曰：「吾先師宋沖元所秘，得者名在仙格，汝雖得之，未知其要」。因指授之，且曰：「二氣之前，道為祖，道以一氣生三才，故天有九陽，人有九元，地有九陰。人之稟生，苟能歸其祖，守其元，則感通變化，無所不適。此書昔西靈金母授漢武帝，武帝傳李少君，而後太極左仙公得之。葛稚川又得之於羅浮山。先師於洞庭君山復得之於葛仙公」。因戒曰：「鎮元之道，乘大魁，履北極，視瑤光，躡丹元，倚靈田，蹈闔陽，運元綱，握天樞，執持六氣，指揮萬靈，外可以召神，內可以延生」。虛寂如所戒而修之，無不神驗。忽謂人曰：「蜀多名山，為神仙所會，吾將遊焉」。既至，則常持灰數勺，貯紙囊中，或問之？曰：「此可治百病」。有請者，以津液調與之，疾無不愈。又嘗患口瘡，謂人曰：「視吾口中」。乃張之如箕，五藏悉露，視之者無不驚訝。後入新繁銅馬觀，久之，常與人言：「昔黃帝與甯先生天真皇人，會眾真於此，號其地為三會臺。有銅馬隱於林間，今龍橋乃其舊跡。後之人於銅馬隱處，築臺以誌之。秋夕澄霽，銅馬忽騰躍嘶鳴，見之者得道，予往來此三十年，幸一見之」。居歲餘。忽謂鄰母曰：「旦夕將他適，欲以後事相託」。因指視其地，囑曰：「瘞我於此，當深三尺餘，吾必有厚報」。是夕卒，鄰母如其言而瘞之，果得金一鎰，以聞官，驗所瘞，但杖履而已。乃知神仙解化，報答鄰母，遂復予之。母有子自臨邛歸，見虛寂以二甘瓜於新津上命坐，分食其一，又一使遣其母，謝曰：

¹⁰⁶【案】三洞群仙錄卷五「虛寂馬鳴」條係刪節，歷世真仙體道通鑑卷四十二著錄，文全。

「積年所擾，一旦遠別，再會無期，寧免憶快」。其子還舍，始知化去。進士馮道為傳。

陳寡言¹⁰⁷

道士陳寡言，字大初，越州暨陽人。隱居於王靈峰，號曰華林。天台科法有闕遺者，拾而補之。居常以琴酒為耽，每吟詠，放情自任，未嘗加飾。其山居詩曰：「醉臥茅堂不閉關，覺來開眼見青山。」¹⁰⁸ 松花落處宿猿在，麋鹿群群林際還」。又曰：「照水冰如鑑，掃雪玉為塵。何須問今古，便是上皇人」。寡言雖補闕科教，而不躬行，惟傳度弟子。有劉介者，字處靜，捨明經業，即婺州蘭谿，事靈瑞觀主吳守素為道士。聞寡言之名，遂就華林請教，奉几杖香火凡二十年，盡寡言之道。寡言將尸解，謂處靜曰：「當盛我以布囊，置石室中，慎勿以木為也」。享年六十四。處靜與葉藏質、應夷節為方外友。久之，將坐化，以詩示其徒，乃返真。其辭曰：「我本無形暫有形，偶來人世逐營營。輪迴債負今還了，搔首索然歸上清」。別有詩十篇，今在天台道元院。

任可居¹⁰⁹

道士任可居，不知何許人。年四十，木訥願●。負囊笈，事王道榮，道榮憐其志，以鎮元策靈書訣付之，戒曰：「十八年後，方可以示人災福之驗。勿窺榮利，毋妄傳授，此道得之者神仙，泄之

¹⁰⁷ 【案】三洞群仙錄卷六「寡言石室」條係刪節，歷世真仙體道通鑑卷四十著錄，文全。

¹⁰⁸ 「開眼」三洞群仙錄作「滿目」。

¹⁰⁹ 【案】三洞群仙錄卷十二「可居占斗」條係刪節，歷世真仙體道通鑑卷四十二著錄，文全。

者天枉。昔宋冲元傳翟乾祐，乾祐傳舒虛寂，虛寂傳予，予今傳汝五世矣。必付人，則當察其志行，而後授之，毋自貽咎」。可居遂秘之，常以他術自給，人亦莫能知，凡二十年，漸言人休咎，或為禳醮。每占，先令人齋戒向壁，列燈為斗魁之像，坐其前，禍福吉凶，歷歷如見。唐昭宗大順中，忽謂華陽令高魯思曰：「某旬日間當去世，公為我戒門弟子，毋為俗禮，蓋道家之所忌」。及期，無疾而終。魯思如其言而戒之，其鎮元策靈書不復傳焉。

徐靈府¹¹⁰

道士徐靈府，號默希子。錢塘天目山人。通儒學，無意於名利。居天台雲蓋峰虎頭岩石室中，凡十餘年。門人建草堂請居之，弗往；而後自廬於石層上。喬松脩竹，森然在目，有環池方百餘步，中多怪石若島嶼，因名之曰方瀛，日以修煉自樂於其間。嘗為詩曰：「寂寂凝神太極初，無心應物自雲輿，¹¹¹ 性修自性非求得，欲識真人祇是渠」。¹¹² 又曰：「學道全真在此生，迷〔途〕（徒）待死更求生」。¹¹³ 今生不了無生理，縱復生知何處生」。¹¹⁴ 唐會昌初，武宗詔浙東廉訪使以起之，辭不獲，出見廉使，獻言志詩曰：「野性歌三樂，皇恩出九重。求傳紫宸命¹¹⁵免下白雲峰。¹¹⁶ 多愧書傳鶴，深慚紙畫龍。將何佐明主？甘老在岩松」。廉訪奏以衰槁免命，由此絕粒。久之，凝寂而化，享年八十二。著玄鑑五篇，注通

¹¹⁰ 【案】三洞群仙錄卷六「靈府草堂」條係刪節，歷世真仙體道通鑑卷四十著錄，文全。

¹¹¹ 「自雲輿」三洞群仙錄作「降雲輿」全唐詩作「等空虛」。

¹¹² 「真人」全唐詩同，群仙錄作「真精」。

¹¹³ 「迷途」據群仙錄正，全唐詩作「何須」。

¹¹⁴ 「縱復」群仙錄作「縱得」，全唐詩作「縱復生知那處生」。

¹¹⁵ 「求傳」群仙錄作「傳來」，全唐詩作「那煩」。

¹¹⁶ 「免下」群仙錄作「遣下」，全唐詩作「遠下」。

玄真經十二篇，及撰天台山記、三洞要略。門人得其道，惟左元澤。

譚峭岩¹¹⁷

譚峭岩，茅山道士。唐敬宗寶曆中，遊天台江浙間，年貌如二十許人，人亦不知其有道。務以陰功救物，常遺金于途，以拯貧乏。或報〔之〕，¹¹⁸殊不認，問其故？則曰：「陰真君化土為金，以賑不足，吾恨未能；且無用之物以〔遺〕（邀）人，¹¹⁹亦何怪」？久而知其有術，神丹以化瓦礫，符篆以制鬼神。或者話隋煬帝東巡事，峭岩忽失言曰：「大業年中，開丹陽河斷三岡脈，其下血流，吾嘗往觀之」。由此知峭岩之壽，蓋數百年矣。弟子鄧甲久事之，授以丹訣符術，則不能盡其妙，但陸擒兕虎，水縛蛟螭而已。峭岩謂曰：「人賦分有定，水石能致其熱，火不能致其寒。雖盡吾之道，而汝則止是矣」。文宗開成中，輕舉於南嶽矣。

陳搏¹²⁰

先生姓陳名搏，字圖南，號扶搖子，亳州真源人也，與老子同鄉里。生而不能言，始四五歲，戲渦冰之濱，有青衣媼召置懷中乳之，自是能言，聰悟過人。及長，經史一覽無遺。年十五，詩禮書數至方藥之書，莫不通究。親喪，先生曰：「吾向所學，足以記姓

¹¹⁷【案】三洞群仙錄卷九「峭岩拯貧」條係刪節，歷世真仙體道通鑑卷二十八著錄，文全。

¹¹⁸「之」據三洞群仙錄補。

¹¹⁹「遺」據三洞群仙錄正。

¹²⁰【案】三洞群仙錄卷十三「圖南道成」條係刪節，歷世真仙體道通鑑卷四十七著錄，其後段乃別家文，茲不取。

名而已，吾將棄此，遊泰山之巔，長松之下，與安期黃石輩，論出世法，合不死藥。安能與世俗輩，脂韋汨沒，出入生死輪迴間哉！」！乃盡其家業，散以遺人，惟攜一石鐺而去。唐士大夫挹其清風，欲識先生面，如景星彩雲之出，爭先睹之為快，先生皆不與之友。由是謝絕人事，野冠草服，行歌坐樂，日遊市肆，若入無人之境，或上酒樓，或宿野店，多游京國間。後唐明宗聞先生名，親為手詔召先生，至，長揖人主，明宗待之愈謹，賜先生號清虛處士，仍以宮女三人賜先生。先生為表謝上云：「趙國名姬，漢庭淑女。行尤婉美，身本良家，一入深宮，人膺富貴，昔居天上，今落人間。臣不敢納於私家，謹用安之別館。臣性如麋鹿，●若萍蓬，飄若從風之雲，泛如無纜之舸。臣送彼復歸清禁。及有詩上浼聽覽」。詩云：「雪為肌體玉為●，多謝君王送到來。處士不生巫峽夢，空煩雲雨下陽臺」。以書奏付宮使，即時遞去，因肆意山水間。自言嘗遇孫君仿鹿皮處士二人，謂武當山九室岩可以隱居，遂往棲焉。服氣辟穀，以恬默自處，凡二十餘年。撰指玄篇八十一章，入室還丹詩五十首，又作釣潭集萬餘字。皆羅縷道妙，包括至真。嘗夜立庭間，見金人持●呼曰：「子道成矣，當有歸成之地」。先生曰：「〔何謂歸成〕」？¹²¹ 金人云：「歸成之地，蓋秋為萬物之所斂而歸者也」。「吾其隱於西方乎」？是時年已七十餘。俄徙居華山，得古雲臺觀基，闢荆榛而居之，以契歸成之語。時境內有虎食人，先生至，叱虎令去，自是不為害。

¹²¹ 「何謂歸成」據三洞群仙錄補。

李含光¹²²

弘孝威，¹²³ 晉陵人也，家本淳儒，州里號貞隱先生，後避唐敬宗諱，改為李氏。其子曰含光，年十三，篤好道學，雖處暗室，如對君父，然人見之神色皆斂。工篆隸，或稱過其父，一聞之，終身不書。後師正一先生，雲篆寶書，傾囊相付。且曰：「〔李含光〕真玉清之客也。」¹²⁴ 抱虛無而行功，則其道不窮，託幽阜而滅●，則於德亦淺。承教雖遠，宜先救人」。含光既稟真訓，乃忘情於身，周急於物。每啟章奏，則齋心潔己，未始少怠。唐明皇召見問理化？對曰：「道德經者，君王之師也。昔漢文帝行之，躋民於仁壽之域」。又問金鼎？曰：「道德者，公也。輕舉者，公中之私也。雖見其私，亦聖人之存教。若求生徇欲，類於繫風，不亦難乎」？帝〔甚〕嘉之，¹²⁵ 優禮以待。未幾以疾辭，東歸句曲，詔為紫陽觀以居之。帝受楊許真經，請為師，復以疾不赴。遂於大同殿具詞遙請，加號文靖先生。手詔屢降，給奉相續。嘗撰仙學傳，及論三玄異同，並本草音義。又詔補楊真人手●數紙。代宗大曆四年十一月，謂弟子韋景昭孟湛然曰：「吾將順化」。有頃，顏色怡然而往。於是祥雲降，芝草生。享年八十七。

¹²² 【案】三洞群仙錄卷十一「李對道經」條，及卷十三「含光清客」條，均係刪節，歷世真仙體道通鑑卷二十五著錄，文全。

¹²³ 原作「晉陵人也弘孝威」今乙正。

¹²⁴ 「李含光」據三洞群仙錄補。

¹²⁵ 「甚」據三洞群仙錄補。

軒轅集¹²⁶

羅浮（山）先生軒轅集者，¹²⁷ 不知何許人，居羅浮山。人傳數百歲，顏色不老，髮長垂地，坐暗室則目有光。長數丈，每採藥於岩谷，則毒龍猛獸隨之，若有所衛護。居常民家請齋者，雖百餘處，無不分身而至。與人飲酒，則袖出一壺，才容一二升，賓客滿座傾之，彌日不竭。人命飲，百升不醉。夜則垂髮於盆中，其酒漉漉而出，麴蘖之香，略無減耗。或飛朱篆，則可致千里。遇病者，以布巾拂之，即應手而愈。唐宣宗召入，問長生可致乎？答曰：「絕聲色，薄滋味，哀樂一致，德施無偏，自然與天地合德，日月齊明。雖堯舜禹湯之道可致，況長生久視乎？」¹²⁸ 又問先生與張果熟愈？曰：「臣不知他，但年少於果耳」。及退，又以金盆覆白鵲試之，時集方休于外，¹²⁹ 謂中人曰：「皇帝安能更令老夫射覆乎？」中人不諭其意，上復召令速至，集纔及玉陛，謂上曰：「盆下白鵲，宜放之」。上笑曰：「先生早知矣」。命坐御榻前，令官人侍茶湯。集貌古而布素，有笑之者，則鬢髮朱唇，年方二八，須臾變為老嫗，雞皮、鮐背、鬢髮皤然，皆泣涕不已，上令謝之，卻復故。京師素無豆●荔枝，上因語及，俄頃二花皆至，各數百朵，枝葉方茂如新剪者。又嘗相子，集曰：「臣山下有者，味踰於此」。上曰：「朕無緣得矣」。集遂取御座前碧玉甌，以寶盤覆之，俄頃徹盤，相子在其下，上食之，歎其甘美無比。又問曰：

¹²⁶ 【案】三洞群仙錄卷七「軒集授葉」條，卷十「金盆射鵲」條，及卷十四「集獻荳蔻」條，均係刪節，歷世真仙體道通鑑卷四十二著錄，文全。

¹²⁷ 三洞群仙錄作「羅浮先生」，山字衍。

¹²⁸ 三洞群仙錄卷七「軒集授葉」條，「況長生乎」下接「先生能以桐竹葉授成錢」一句，本文未見，似當在最後敘「施貧者錢」一段內，今已佚去。

¹²⁹ 「外」三洞群仙錄作「●」。

「朕得幾年天子」？即取筆書「四十」字，但十字一起，上笑曰：「朕安敢望四十年乎」？及晏駕，乃十四年也。久之，辭還山，命中使送之，每見其於一布囊探錢，以施貧者，比至江陵，數十萬取益不竭。未及山，忽亡其所在，中使惶恐。不日，南海奏先生已歸羅浮山矣。

葉藏質¹³⁰

道士葉藏質，字含象。處州松陽人。法善之裔也。初隸安和觀為道士，詣天台馮惟良授三洞經籙，於玉霄峰選勝，創道齋，號石門山居，其前有二峰聳峭對峙，故曰石門。日誦道德度人二經，晚年尤精符術，請之者如織。婺州牧為邪物所撓，詣請符，至中路犯以穢忌失之。牧親造，見案上有筒，封檢甚固，乃前之符也。因焚香置匣捧歸，崇物遂絕。由是獲驗之家有所施，不得已則少留之，悉為葺壇宇功德之費。牧乃表其賢，唐懿宗優詔石門山居為玉霄觀。〔一日〕，¹³¹忽命酒召其友應夷節同飲，語及生平事，然後告以行日。及期，題於門曰：「雞鳴時去」。門人遂聞珠珮雜鼓樂聲于空中，¹³²須臾雞唱，視之已化矣。年七十四。

羅公遠¹³³

羅公遠在唐時已數百歲，乍老乍少，人莫識之。時太守醺屬吏于郡之園亭，士庶競至，忽一白衣來，有一小童叱之，曰：「汝擅

¹³⁰【案】三洞群仙錄卷十九「藏質雞鳴」條係刪節，歷世真仙體道通鑑卷四十著錄，文全。

¹³¹「一日」據三洞群仙錄補。

¹³²三洞群仙錄「珠珮」作「環佩」，「鼓樂」作「簫管」。

¹³³【案】三洞群仙錄卷十八「公遠白魚」條著錄。

離本處」！白衣人去，吏執小童以白太守，問名？答曰：「羅公遠；適見龍王，為公逐之」。刺史未之信，曰：「可見本形否」？曰：「不難」！遂穿一穴，以水引之，一白魚隨流而躍，青煙如線，頃之，黑氣橫天，雷電而雨，化白龍飛去。

陶天活¹³⁴

陶天活者，南安人。居海濱，海水忽溢，家人悉驚走避難；天活始生，其母挈去不能得，舉家皆泣之。洎水落而歸，其子在桑之交枝無恙，因名之曰天活。及長慧悟，而真氣內足。自唐憲、穆、恭、文四宗朝，充內供奉道士。時公卿大夫，無不欽尚，後歸海濱不復出。

感庭秋¹³⁵

唐末有狂道士，不知何許人，又晦其名氏。遊成都，忽詣紫極宮，謁杜光庭先生，求寓泊之所，先生諾之，而不與之見。道士日貨藥于市，所得錢隨多少沽酒飲之，惟唱感庭秋之詞，其意亦感蜀之將亡，如庭秋之衰殺。然人未之曉，但呼為感庭秋道士，凡半年，亦不知其異。一夕，大醉歸，夜將闌，倘聞唱聲愈高，有訝之者，隔戶窺之，見燈燭綵●，筵具器皿，羅列甚盛，狂道士左右二青童立侍，時酌酒而唱。窺者具以白先生，乃款其戶曰：「光庭量識膚淺，不意上仙降鑒，深為罪戾！然不揆愚昧，而匍匐門下，冀一拜光靈，以消塵障」。道士曰：「何辱勤拳之若是？當出奉見」。乃令二童收筵具器皿及陳設致於前疊之，則隨手而小，如符

¹³⁴【案】三洞群仙錄卷十八「天活無恙」條著錄。

¹³⁵【案】三洞群仙錄卷七「杜拜庭秋」條係刪節，歷世真仙體道通鑑卷四十三著錄，文全。

子狀，置冠中。又將二童按之如木偶，可寸許，入置冠中。及啟戶，先生忻然而入，但空室而已。先生乃下拜問道？道士曰：「子之行業未至，更宜修煉真心，今遺子三隻酒杯，玉燭二條。此杯者，南海蟠桃之核也，大小如盞，以物擊之，清聲如金，其上紋彩，●如百花，霞光透明，內外瑩白。收此為信，更候三年，方得際會」。言訖，化一道火光，乘空而去矣。

俞靈●¹³⁶

俞靈●者，河間人。居衡山九真觀，學道十餘年。南岳赤君異之，授迴風之道，及守明梁之法，行之二十年，能坐見天上事，如視諸掌。然自晦，不為異以驚俗，而人亦不知其有靈也。與人談說，多及四海九州遊歷事跡。其貌常若三十許人。唐憲宗元和中，郴州官吏見靈●，說其祖父名氏、狀貌、嗜性、職掌、年壽皆中，眾驚異而禮之。但曰：「我偶然爾，非所知也」。遂入閉關不出，雖懇請亦不復有言，方知其是異人。常誦大洞經，或絕粒，或飲酒，有潘老仙遊岳與靈●交甚密，養一元龜，廣四五尺，力可敵十人，見者畏之，靈●因乘入九嶷山去，採樵者時見之。

厲歸真¹³⁷

道士厲歸真者，不知何許人。唐末遊洪州信果觀，見三官殿功德塑像有明皇，詔以夾〔紵〕（紵）製作甚妙，¹³⁸然主者不甚嚴

¹³⁶【案】三洞群仙錄卷十七「靈●乘龜」條係刪節，歷世真仙體道通鑑卷四十二著錄，文全。

¹³⁷【案】三洞群仙錄卷十三「厲畫一鵝」條，與歷世真仙體道通鑑卷四十著錄文同。

¹³⁸「紵」據三洞群仙錄正。

護，常多雀鴿糞穢點污，歸真遂於壁畫一鴿，自此雀鴿無復栖止。後有人見歸真於羅浮山登真矣。

杜光庭¹³⁹

道士杜光庭，字賓聖，號東瀛子。本處州人。博極群書，志趣超邁。唐懿宗朝，與鄭雲叟賦萬言不中，乃奮然入道，事天台道士應夷節。常謂道法科教，自漢天師暨陸脩靜撰集以來，歲月綿邈，幾將廢墜，遂考真偽，條列始末，故天下羽●，永遠受其賜。鄭畋薦其文於朝，僖宗召見，賜以紫服象簡，充麟德殿文章應制，為道門領袖，當時推服，皆曰：學海千尋，辭林萬葉，扶宗立教，海內一人而已。中和初，從駕興元，道遊西縣，適遇術士陳七子名休復，灑然異之，披榛穴地，取瓢酒酌之，曰：「以此換子五藏爾」。先生知國難未靖，上表●游成都，喜青城山白雲溪氣象盤●，遂結茅居之，溪蓋薛昌真人飛昇之地也。未幾，駕將復都，詔光庭醮二十四位。會王建●蜀，召為皇子師。建謂曰：「昔漢有四皓，不如吾一先生足矣」。光庭不樂宮中，薦許寂徐簡夫自代，因老于成都。相國徐光溥志學之年，執弟子禮事之。光庭嘗謂曰：「予初學於上庠，而國子監書籍皆備，先讀天文神仙之書，次覽經史子集。一月之內，分布定日而習之。一日誦經書，二日覽子史，三日學為，四日記故事，五日遊息。凡五事，每月各六日。如此不五七年，經史備熟」。韋藹學士以兄之相國莊之文集請為序，光庭曰：「相國富有文辭，若集中不刪落小悼浮豔等詩，不敢聞命」。建用張格，乃唐相濬之子，其才術高於時，而於故實未通。治蜀初，小大事每令咨稟，蓋光庭非止善辭藻而已，有經國之大才。時

¹³⁹【案】三洞群仙錄卷十五「賓聖白犬」條係刪節，歷世真仙體道通鑑卷四十著錄，文全。

有道士感庭秋謁之而不遇。一日，忽謂門人曰：「青城方創，真宮工未畢，昨夢朝上帝，以吾作岷峨主司，恐不久於世」。門人皆霑襟。及真宮成，時後唐〔明〕（莊）宗長興四年癸巳十一月，¹⁴⁰ 光庭八十四歲，一旦披法服作禮，辭天陞堂，趺坐而化，顏色溫睟，宛若其生，異香滿室，久之乃散。光庭有一白犬，目之曰：「吠雲」。令以麻油塗足，〔縑〕（繪）布裹之。¹⁴¹ 曰：「吾聞油塗犬足，可日行萬里逡巡」。吠雲亦號叫數聲而斃。光庭嘗撰混元圖、紀聖賦、廣聖義歷、帝記、暨歌詩雜文，僅百餘卷行于世。凡所著述，未嘗不以經濟為意。蜀主王建初賜號廣德先生，又欲優於名秩，詢于故事，毛文錫獻言：唐武德初，祁平定為金紫大夫；開元中，尹愔居諫省。於是以為諫議大夫，封蔡國公，進號廣成先生，延之玉局化。通正初，遷戶部侍郎。衍襲位，尊為傳真天師，特進檢校太傅太子賓客兼崇文●大學士。

軒轅彌明¹⁴²

道士軒轅彌明，往來衡湘間，與劉師服友善。彌明自衡山過太白，知師服在京，夜抵其居，校書郎侯喜有詩名，與師服擁爐說詩。彌明在座，貌甚陋，喜視之，蔑如也。彌明因指爐中石鼎曰：「二子能賦此乎」？師服雖舊識，不知其有文也。劉先（生）吟曰：「巧匠斲山骨，剗中事煎烹」。次侯曰：「直柄未當權，塞口且吞聲」。彌明啞然笑曰：「子詩如是而已」！因高吟送賦十餘

¹⁴⁰ 「縑」據三洞群仙錄正。

¹⁴¹ 莊宗無長興年號，四年癸巳為明宗，今據曆譜正。

¹⁴² 【案】三洞群仙錄卷八「彌明賦鼎」條著錄。案仙傳拾遺有「軒轅彌明」篇，高道傳所記，當出節錄，故據三洞群仙錄所引輯入。

韻，彌明應之如響，二子思竭不能續，起謝曰：「尊師非世人能出也。〔某〕（其）輩伏矣」。¹⁴³

呂志真¹⁴⁴

呂志真者，不知何許人。廣成先生劉元靖之弟子也。內潔而外和，似不能言者。居石室中十餘年，其後每歲一至京師，遊瀟湘，訪諸門人之家。常荷二大瓢，藥物、服飾、經籙、道具、皆貯之。喜以藥石救人，入林谷則有虎豹隨之。人問其道，則默然無所對。出商山道中，忽失色不前，人皆訝之，且〔曰〕（者）：¹⁴⁵「前有剽掠者來」。果見兵刃，志真謂賊曰：「此行者皆吾弟子，毋得干之」。其徒歛衽避路，不復敢前。又至一谷口，曰：「此有害人之物」。同行〔欲見之〕，¹⁴⁶遂入林中以繩繫二虎而出。由是知志真深得廣成之道。嘗云：先初居石室時，所處甚隘，一夕致醺，忽山開數十步，其中平敞，復有黑豹，馴繞其側。

李道盛¹⁴⁷

道士李道隨盛與鄭遨、羅隱之為友，遨種田，隱之貨藥以自給。道盛有釣魚術，釣而不餌。又能化石為金，遨嘗驗之，信而不求。俱好酒能詩，善●●，長嘯，有大瓢，云可辟寒暑，置酒於其中，經時味不壞。日攜就花木水石間，一觴一詠，嘗因酒酣聯句，

¹⁴³「某」原作「其」，誤，今正。

¹⁴⁴【案】三洞群仙錄卷三「志真繫虎」條係刪節，歷世真仙體道通鑑卷四十著錄，文全。

¹⁴⁵「曰」據三洞群仙錄正。

¹⁴⁶「欲見之」據群仙錄補。

¹⁴⁷【案】三洞群仙錄卷九「李釣不餌」條著錄。

鄭曰：「一壺天上有名物，兩箇世間無事人」。羅曰：「醉卻隱之雲叟後，不知何物是天真」？

賀自真¹⁴⁸

道士賀自真有學，趣嚮高邁，居嵩山修道。一日，雲鶴音樂，雜滿空際，自真遂昇虛而去。處士陳陶與洛人瞻之，因賦詩曰：「子晉鸞飛古洛川，金桃再熟賀郎仙。三清樂奏嵩山下，五色雲屯御苑前。朱頂舞迎低絳節，青鬟歌引駐香輶。誰能白晝想悲泣，太極光陰億萬年」。

¹⁴⁸【案】三洞群仙錄卷十「自真鼎虛」條著錄。

高道傳卷四

宋賈善翔撰 嚴一萍輯校

朱孺子¹⁴⁹

朱孺子，永嘉安固人也。幼而師道王玄真，¹⁵⁰居大●巖。勤苦事於玄真，深慕仙道，常登山嶺採黃精服餌，歷十餘年。一日，就溪濯蔬，見岸側有二小花犬，孺子異之，乃尋逐枸杞下，玄真與孺子共尋掘，乃得二枸杞根，形狀如花犬，堅若石，洗潔，歸以煮之。而孺子益薪看火，三晝夜不離●側，試嘗汁味，取喫不已，及見根爛，以告玄真，共取食之。俄頃，孺子忽飛昇在前峰上，玄真驚異。久之，孺子謝別玄真，昇雲而去。到今號其峰為童子峰。玄真後餌其根盡，不知其年壽，亦隱於巖之西陶山，有採捕者時或見之。

¹⁴⁹【案】三洞群仙錄卷五「孺子烹犬」條係刪節，歷世真仙體道通鑑卷三十六著錄。案原出續仙傳，而略加刪削。

¹⁵⁰「王玄真」三洞群仙錄作「王元正」。

向道榮¹⁵¹¹⁵²

道士向道榮，不知何許人。為人朴略，事虛寂，授鎮元策靈書，而名聞於蜀，嘗欲以金三十兩鑄白馬老君，三分已備其二，嘗以未成功，未懈意。一日焚誦，有物墮地，開視之乃十兩金也，遂畢其願。與華陽丞呂翼友善，置酒數斗，令翼飲，達曉不醉。自言去世月日，謂平生之故，當送我於東郊巨松之下，以薪火燎棺為惠。翼翼其記託時語，與其友章昇常粲數十輩，共誌其日以伺之。前一夕，道榮●詣知友家，飲酒言笑，至暮，宿於逆旅。翼使人密視之，見寢處如常，黎明則已化，而顏色不變。翼與昇粲具棺槨，於砂坎之西巨松下，致薪舉火已發，棺中烈焰不可近，見道榮出於煙●上，冉冉凌虛而去矣。

李真¹⁵³

道士李真者，不知何許人。隱華山。岐州之西王祐者，家鉅萬計，常設●以待四方士，嘉穀旨酒，無不備具。真攜琴負藥壺謁祐，遂迎于●。真問曰：「君之富，有侯伯之樂，然如不賢何？」祐笑而唯唯。真復曰：「君虛●置饌以俟賢者耶？以待饑者耶？苟以待饑者，則方今天下幸無闕食者；苟以俟賢者，則未聞君得賢。以是知君不賢爾，毋訝我言也！正恐君徒尚虛名，而無待賢之實，君若能悟，則吾言不惟無益矣」。祐●動容再拜。又曰：「我聞人之〔好〕樂¹⁵⁴，皆有以師事。縱橫者，必有游說之志；讀韜略者，

¹⁵¹三洞群仙錄卷二「道榮焚櫬」條作「句道榮」，文係刪節，歷世真仙體道通鑑卷四十二著錄，文全。

¹⁵²「向」三洞群仙錄作「勾」。

¹⁵³【案】三洞群仙錄卷十五「攜琴負壺」條係刪節，歷世真仙體道通鑑卷四十三著錄，文全。

¹⁵⁴「好」據三洞群仙錄補。

必有戰敵之心。吾攜一張琴，一壺藥，豈無旨哉？攜琴者，我知琴有古風，欲使人還淳朴，省澆浮也。負藥壺者，我知人之多病，欲使人之少疾苦而常安平也。且我之琴，非〔止〕（正）自化也，¹⁵⁵化人也。我之藥，非〔止〕（正）自保也，¹⁵⁶保人也。君雖能以有餘濟於人，固與不義而誅剝以富者，則異矣。然此乃古之豪貴，待士則未也。要在賢不肖有別，則君之身可係無累矣」。祐復再拜，真乃命酒自酌，遲晚遽醉而去。王潛伺之，見真化一大鹿，西走不知所之。

輔神通¹⁵⁷

輔神通，幼孤貧，為人牧牛以自給，每於牧所見一道士往來，久而稔熟。謂神通曰：「能為弟子乎」？曰：「可」！乃引入水：「汝宜隨之，無憚」！既入，見所居嚴潔，有藥囊丹●，使神通看火，兼教黃白術。經三年，神通●思人間，會道士出，乃竊丹別貯之。既歸，問丹所在？則隱而不言。道士嘆息曰：「吾本與汝道要，今若是，曷足授教，雖備解諸法，然無益長生」。遂引去。

宋元白¹⁵⁸

道士宋元白，一日，越州大旱，方曝●檄龍以祈雨，久之，亢陽愈甚。元白謂人曰：「凡所降雨，須俟天符，非上奏，無以

¹⁵⁵ 「止」據群仙錄正。

¹⁵⁶ 「止」據群仙錄正。

¹⁵⁷ 【案】三洞群仙錄卷八「神通竊丹」條著錄。

¹⁵⁸ 【案】三洞群仙錄卷六「宋香足雨」條著錄。案此篇原出續仙傳，三洞群仙錄引據高道傳，當係刪節。今據三洞群仙錄文輯入。

致」。於是止於元真觀，焚香上祝，經夕大雨告足。越人神異之。信州復旱，郡將特請禱，元白遂作術以告城隍之像，則須臾致雨。

閻丘方遠¹⁵⁹

閻丘方遠，字大方。幼辯慧，通經史。昭宗累詔不就，錫命服，賜號玄同先生。羅隱每詣受書，先生●閉目授之。曰：「隱才高識下，蓋正容悟物」。故隱卒保終吉。先生一日，忽沐浴焚香，端坐返真，顏色不變，異香三日不散。時錢武肅夢先生騎鶴訪別，明日訃至。及就壙，但空棺而已。

聶師道¹⁶⁰

聶師道，字通微。新安歙人也。性聰淳直，言行謙謹，養親以孝聞，深為鄉里所敬。少師事于方外郎，德誨之從兄也。德誨自省郎出牧新安，乃於郡之東山，選勝地構室宇以居之，目為問政山房，而師道事之辛勤。年十三，披戴冠裳。十五，傳法錄修真之要，後出遊績溪山。自言嘗覽內傳，見服松脂法，乃與道侶上百丈山採松脂，崖石●聳百丈，遂以名之。其四望高千餘仞，夜宿於崖頂松下，天清月朗，忽聞仙樂起自東南紫雲山，遙遙而來，遲遲過於石金山。石金與百丈，其高相等，雖平地隔三十餘里，山頂相望咫尺間。乃聞仙樂到彼，輟少時，●小鼓三通，復通奏金石笙簫絲匏響亮，擊鼓而拍，莫審其曲調，聲揭而清，特異人間之樂，自三更及雞鳴而止。後問於山下人，是夜皆聞之。其同侶嘆曰：「方採靈藥，遽聞仙樂，豈非有感，此亦君得道之嘉兆矣」。其後遊行，

¹⁵⁹【案】三洞群仙錄卷十一「方遠辯慧」條著錄。

¹⁶⁰【案】三洞群仙錄卷十八「聶遇彭蔡」條係刪節，歷世真仙體道通鑑卷四十一著錄。案源出續仙傳，而略加刪削。

歸南岳，禮玉清及光天碧玉二壇。後泊招仙觀，入洞靈源，時當春景，聞蔡真人舊隱處不遠，有花木甚異，採樵者時或見蔡真人在其間。師道喜之，乃辟穀七日，晨起獨往山中，漸行聞花有異香，不覺日晚，忽到大溪傍，見一樵人，臨水坐於沙上。師道驟欲親近，方乃負樵將下溪，迴顧師道，卻駐樵檐，問：「獨此何往」？應之曰：「學道尋仙，深心自切。聞蔡真人隱此山，願一禮謁爾」。樵人曰：「蔡君所居極深，人不可到」。師道曰：「攀蘿登崖，已及於此，有山通行，豈憚遠近」。樵人又曰：「日將暮矣，且行過此山，東有人家可宿」。師道欲隨樵人去，樵人遽入溪水甚淺，及師道入水，極深而急，不敢涉。樵人曰：「汝五十年後，方過得此溪」。目送樵人步水面而去不見。師道迴山東十餘里，遙望見草舍三間，有籬落雞犬，漸近，見一人青白色似農人，年可三十，獨居，見師道到，甚訝師道深山自行，忽曰：「家累俱出，何為主」？又問師道：「此來何之」？應曰：「尋蔡真人隱居」。主人曰：「路上見樵人否」？曰：「見」。主人曰：「此蔡道者，適過也」。師道聞之，禮祝曰：「凡愚見仙聖不識，亦命也」。已逼夜，山林深黑，投宿無地。又問曰：「從何來」？具以發●新安尋真之由以對。乃許入其舍，復指師道令近火爐邊●上坐，曰：「山中偶食盡，求之未歸」。師道曰：「絕粒多時，卻不以食為念」。見火側有湯鼎，復有數箇黃磁合，主人曰：「合內物可喫，任意取之」。乃揭一合是茶，主人曰：「以湯潑喫」。及喫，氣味頗異於常茶，久之復思茶，更揭之，合不可開，●揭諸合，皆不能開。師道心訝不似村人家而不敢言。主人別屋睡，日高不起，又無火燭，睡中曰：「此孤寂之處，忽病無以相待，前村人家甚多，可以往彼」。師道遂行數里，不見人家，悉是崖險，乃迴盼已迷向宿之處，復行約三十餘里，忽逢見一老人，欣喜邀於石上坐，問入山之意，具以前事對之。老人曰：「蔡君父子，俱隱此山，昨夜所宿之處，即其子也」。又曰：「爾道氣甚濃，仙骨未就，入山饑渴，曷

能久留此哉」？俄折草一莖與師道，形若薑苗而長尺餘，嚼味甘美，復令取泉水，嚙次舉頭，已失老人所在。師道悲嘆不已，而覺食茶草之後，氣力輕便，愈於來時。卻欲沿山路尋宿處，其路已為棘蔓蔽塞，前去不通，卻迴招仙觀，眾道士驚異曰：「此觀雖靈岳側近，蟲獸甚多，人罕能獨行，何忽去月餘日，實久憂望。師道曰：「昨日方去，始經一宿」。具言見樵人及宿處，又逢老人，道士皆嘆曰：「吾輩雖同居此觀，徒為學道，知有蔡真人，無緣一見，吾子夙有仙分，已見蔡君父子。其老人者，昔聞彭真人亦隱此山，豈非彭君乎？子一入山，遽逢三仙人，一日一宿，人間月餘矣。其實積習之命也」。師道深自嘆異，駐招仙觀修煉逾年，後以親老思歸，卻迴問政山。每入諸山拾薪斲藥，或逢虎豹，見師道則垂耳搖尾，俯伏於地。師道以手撫而呼之，乃起隨行，或以薪藥附於背上，負之送歸而去。昔郭文舉居大滌洞，伏虎亦如之。歎之近山，頗有猛獸而不為人之害者，自師道之感也。其親時問師道遊學所益，具陳其事，親聞之而喜曰：「汝以孝養，我以道資，亦幸為汝母矣。此蓋宿慶之及也」。後又出遊，復思往南岳九嶷山，早聞梅真人蕭侍郎皆隱玉笥山，時人多見之。梅即南昌尉梅福也，蕭即梁之公子蕭子雲也。自東陽太守避侯景之亂，全家入山。二人俱得道於此。師道且止玉笥清虛觀，思慕梅蕭，特遊郁木坑，或冀一見，堅心而去，山行極深，忽見一人布衣烏紗帽，顏若五十許人，師道禮敬問之，初自稱行者，問師道何往？乃以尋梅蕭為答，行者曰：「聞爾精勤慕道，遍訪名山，誠亦非易，欲見二君，行者可以相引，爾宿業甚淨，已應玉籍有名，雖未便飛昇，當亦度世爾」。行者又曰：「我謝通修也，恐爾未識，故以自言。本居南岳，與彭蔡同隱已三百年。知爾嘗遊洞靈源，我適為東華君命主玉笥山林地仙，兼掌清虛觀境土社令，爾與我素有道緣，是得相見。然梅蕭日中為小有天王所召，恐未便還，未可俟也」。師道於是虔拜曰：「凡世肉人，謬探大道，凝神注想，以朝繼夕，未知要妙，若浮于

海，詎識其涯？不期今日，獲見道君，實曠劫之幸也」。通修曰：「丹心懇苦，深可憫哉！爾世事未了，且當送爾出山路，往我所止」。隨行數里，忽見草舍兩間，甚新潔，有床席、小鑪，然火煎湯，儼若書生所居而無人。通修命師道入坐於木馬上，通修自坐於白石鹿上。俄有一髻角童以湯一●與師道，呷之神氣爽然。又指令架上取書一卷，通修曰：「此素書也。但習之無怠，當得真旨」。師道意欲求住師學之，未啟言而通修已知，曰：「爾有親垂老，雖有兄能養，若欲更南遊，此未可言住。我有弟子號紫芝，在九嶷山，若往彼見之，為我傳語，兼出素書示之，得盡其旨矣。或不見，但投素書於毛如溪上洞中，仍題石壁，記我傳語之意，紫芝當自授爾要道」。言訖，乃發遣師道迴，俄不見通修，已在郁木坑外，師道入清虛觀矣。眾道士驚之曰：「一去七日而返，何之也」？師道具以對之。有道士二人，欣躍乞與師道共入郁木坑，到舊處，岩石草樹歷歷宛然，但失其草舍，竟日悵望而迴。師道得素書，文字可識，皆說龜山王母理化眾仙秘要真訣也。他仙習此，當得昇天，世人授之，跡參洞府。其間有疑義不可究者，後到南嶽九嶷山湘真觀月餘，尋問紫芝蹤●，咸言毛如溪有一隱士，莫知姓名，人或見者。師道累入山尋之不見，乃如通修之言，投書題石壁，後嘗夢神人稱紫芝，教之以釋凝滯意，乃醒。然經歲餘，復還問政，居二十餘年，每焚修，即以二蔡、彭、謝真形畫像瞻禮，自以管輅編異傳於道俗。其後，吳太祖●江淮間，聞師道名跡，冀其道德，乃●廣陵建玄元宮以居之。每陞壇祈恩、禱福、水旱、無不應致，感動天地，慶雲呈祥。乃降褒美為逍遙大師問政先生。師道道以資孝，遠不違親，親之在堂，九十有五。丁憂之日，匍匐奔喪，負土成墳，絕漿通禮，便謀遁●，冀遂初心。無何，駟騎繼來，詔命難拒，太祖見待益重，舉國莫不傾依。門人鄒得匡、王處訥、楊匡翼、汪用真、程守朴、曾景霄、王可儒、崔繹然、杜崇真、鄧啟遐、吳知古、范可保、劉日祥、康可久、王栖霞等，皆為

入室弟子，傳上清法，散於諸州府，襲真風而行教，朝廷皆命以紫衣，光其玄門。至秦、吳、荊、齊、燕梁、閩、蜀之士咸來，逾紀勤苦，奉事師道，常謂之曰：「我無道術，何以遠來若此」？弟子皆曰：「若張君居蜀，天下之人，悉往師之，隨其所修，各授以道要。群弟子執奴僕之役，久而不去者，方得成仙。今悉是枯骨，子孫日逼朽腐。思避短景，希度長生，願無卻懇切也」。然師道以仁慈接眾，言不阻違，隨其性識，指以道要，若久行霧露，餘潤漬衣，近羅沈檀，輕香襲體。由是居廣陵三十餘年，有弟子五百餘人。而師道胎息已久，煉丹有成，常欲歸彼故山，為逼睿恩，有違宿願。逮乎歲在辛未秋月，夢一人黑幘朱衣，曰：「先生道成久矣，天命迎之」。先生寤而爽然，乃謂門人曰：「我為仙官所召，處世非久」。以其年十月二十三日，異香滿室，雲鵲立庭，若真靈所集，言別，解化於都下紫極宮，春秋六十有八。●玄墟於太平門外，弟子歛之，棺忽有聲，視之若蟬蛻矣。後數日，人自豫章見之，領一髻角童隨行，道俗多識之，咸問何為遠遊？曰：「離南嶽多年，今暫往爾」。所在多泊舊遊宮觀，半年後，有人自長沙來，亦如豫章所見。復言衡陽路見，歸洞靈源。去樵人言五十年後過此溪，果足驗矣。順義丁亥三月，大丞太師東海王恭按典禮奉還新安，立玄壇，給田莊，改故居為歸真院，仍表薦追贈鴻臚卿，賜冠●法服等，思禮優渥。

李守微¹⁶¹

道士李守微者，不知何許人。常游蜀，善養氣，不食，行疾如風，好飲酒，談論多滑稽，不拘小節，人常輕侮之。忽謂人曰：

¹⁶¹【案】三洞群仙錄卷六「守微茹芝」條，略有刪節，歷世真仙體道通鑑卷四十三著錄，文全。

「予欲遊五嶽諸山，今往矣」。或問求利術？則曰：「浮生瞬息間，當尋真訪道，脫洒塵網。至若服氣煉丹，茹芝絕粒，皆有益也。何區區於利術哉？」遂遁去。或者憾之，聞于偽蜀主，俾求之，卒不得。久之，有人見於梁宋間，或在吳楚，顏狀殊不改。謂人曰：「我適自東海來，又欲南岳去」。後不復見。與祠部韓嶼友善，嶼贈詩云：「一定童顏老歲華，貧寒遊歷貴人家。煉成正氣功應大，養得元神道不差。舄曳鶴毛乾毳●，筇攜杖瘦似槎牙。如何篤隱不歸去？落盡蟠桃幾處花」¹⁶²。

張薦明¹⁶³

張薦明者，燕人也。少以儒學遊河朔，後去為道士，通老子莊周之說。後晉高祖天福四年己亥九月辛卯，上召見，¹⁶⁴問道家可以治國乎？對曰：「道也者，妙萬物而為言，總兩儀而稱德。得其極者，尸居衽席之間，可以治天〔下〕（地）」。¹⁶⁵高祖大其言，延入內殿，講道德經，拜以為師。忽一日，薦明聞禁中奏時鼓，曰：「陛下聞鼓乎？其聲一而已，五聲十二律，鼓無一焉，然和之者鼓也。夫一、萬事之本也。能守一者，可以治天下」。高祖善之，五年五〔月〕（日），¹⁶⁶賜號通玄先生。後不知所之。

¹⁶²韓嶼詩，三洞群仙錄與全唐詩所載，均略有出入。群仙錄作：「一定童顏老歲華，貧寒遊歷貴人家。鍊成正氣功雖大，忘卻元神道更差。舄曳鶴毛乾毳●，杖攜龍甲瘦查牙。如何舊隱不歸去。落盡蟠桃幾番花」。全唐詩作：「一定童顏老歲華，貧寒遊歷貴人家。煉成正氣功應大，養得元神道不差。舄曳鶴毛乾毳●，杖攜筇節瘦槎牙。為何蓬閭不歸去？落盡蟠桃幾度花」。

¹⁶³【案】三洞群仙錄卷六「薦明聞鼓」條，略有刪節，歷世真仙體道通鑑卷四十六著錄，文全。

¹⁶⁴「上」三洞群仙錄作「高祖」。

¹⁶⁵「下」據三洞群仙錄正。

¹⁶⁶「日」誤，今改為「月」。

張契真¹⁶⁷

張契真字齊一，錢塘人也。幼孤，遂依上清宮胡法師，浮游江浙，上會稽，探禹穴，歷縉雲，遊赤城，以訪仙道，契真皆負篋從之。時朱天師居天台，目而器之，以其有清骨方瞳，因度為道士。久之，還錢塘，居吳山真聖宮。周世宗顯德五年，受正一盟威靈寶法籙於大元樊先生。由是紫●玉笈之書，無不歷覽，而名振江浙。〔時〕忠懿王精崇道法，¹⁶⁸ 每三錄齋，¹⁶⁹ 俾總其事，¹⁷⁰ 王公貴人，亦從而欽尚。宋太平興國中，太宗命有司即國之東南建太一宮，詔天下戒潔之士以居之，而契真與選。未幾，禁中清醮，因召見款對稱旨，賜紫衣。而上以道書魚魯未定，詔兩街道錄，選優學者刊正，而契真復與。既畢，賜元靜大師之號。真宗景德三年正月十一日晚，就寢髣●間，有朱衣吏持符而至，曰：「奉命張某宜速淨穢，往彼職事」。¹⁷¹ 遲曉，¹⁷² 召門人徐思簡曰：「吾且行矣，子其志之」。越二十五日，沐浴訖，泊然返真，享年七十一。翼日，遷神于城之東，肢體柔●而汗，●霏于面。及火化，得青黑色珠可升餘，丞相錢惟演謂其徒曰：「此浮屠氏所謂舍利，在仙經則曰精氣凝結而成。步虛經云：舍利耀金姿，龍駕●來迎。是也」。師為性沈默，聲利不容於心，惟嗜好文老而不倦。手抄經史子集，凡五百餘卷。善草隸奕棋，而隱晦自抑。嘗獨坐軒砌，鳥集于懷，其忘機感物如此。

¹⁶⁷ 【案】三洞群仙錄卷十七「齊一反真」條係節錄，歷世真仙體道通鑑卷四十八著錄，文全。

¹⁶⁸ 「時」據三洞群仙錄補。

¹⁶⁹ 「每三錄齋」三洞群仙錄作「每三八錄齋」。

¹⁷⁰ 「總其事」三洞群仙錄作「綜其事」。

¹⁷¹ 「職事」三洞群仙錄作「執事」。

¹⁷² 「遲曉」三洞群仙錄作「遲明」。

張齊物¹⁷³

李臻，燕人也。性溫約，未嘗失於人。遊荊湘間。宋太宗淳化中，至江陵，偶疾作，僑居公安門外，雖貧窶未嘗絕客。忽有道士訪門，自稱姓張名齊物，隴西人。謁臻以求寓泊，臻諾之，但愧貧乏無所待，齊物曰：「貧道不食，可日得酒數升為厚賜爾」。臻諾之。齊物曰：「飲於中，雖屠沽輩亦不問」。至夜後方歸，忽醉罵臻，臻略不介意，待之益厚。又一日，大醉歸，抵臻寢所，至晚方醒，嘔吐狼藉，臥具皆汙，童僕輩怒欲扶之，臻止之，曰：「醉人何足責」。齊物遲明告行，謂臻曰：「感君之顧厚矣，今則復能相送數里乎」¹⁷⁴？臻遂與之偕行，可十里間，齊物曰：「某非滔滔者，薄有所負焉。周遊人間五十年，未嘗見仁厚如君者，願有小術為獻」。臻問何術？曰：「黃白術也」。臻曰：「賦命淺薄，不敢當，願先生察之」。齊物茫然自笑曰：「君之道，非某所及也」。於是抽簪引以為●，執之曰：「請自此別」！乃劃地隨手而裂，投身入於地，地亦隨合。臻嘆異之，由是遂晦●不復見。

張元化¹⁷⁵

道士張元化者，不知何許人，稱華蓋先生弟。游汝墳，汝人因請主北極觀，焚修外，以慈愛及物，而汝人無不悅之，獨不知其密修何道。但混俗和光，未始自異於人。有施油燈於北極殿者，元化以大盆貯水，泛八燈而自成星斗之列，杓建所指，隨曉昏而轉。郡

¹⁷³【案】三洞群仙錄卷十二「李臻晦●」條係刪節，歷世真仙體道通鑑卷四十八著錄，文全。

¹⁷⁴「謂臻曰云云」句，三洞群仙錄作「蒙君厚顧如此，今別去，能相送數里乎」？

¹⁷⁵【案】三洞群仙錄卷十五「河陰市榴」條，及卷十七「元化叱鬼」條，皆係刪節，歷世真仙體道通鑑卷四十八著錄，文全。

人有請齋者，老少無異志而預議之，然未之請，而師黎明必至。其間有意欲請，而夫妻忽反目者，有男女不承順顏色者，雖來請而逆知其意，拒而不往，但勸諭而使之去。觀之側，有●園蔬圃，里人俟其出而竊之，至其園而師已在彼，其先知之見多此類。郡中周司馬與師最相善，然不知授之以何術。師嘗因歲旦，秉葦炬遶巷陌，雖數刻方匝，而炬之燼若初。人訝而詢之，對曰：「有行瘟鬼，吾故逐去」。人以是為狂而不信。及夏，城外果疾疫暴作，而城中貧賤富貴皆無恙。每以符藥救人，有所得悉為焚修之費。一日有客召入酒肆，元化辭以素不飲，後欲與茹葷，又辭以佩法錄。客稍怒，元化熟視之，知其非人也。謂曰：「暫歸觀中，願子少待，即再相見」。因取●而誘出郊，叱使坐而戮之，即鬼也。朱髮藍面，脊薄如五七歲小兒，攜其首以〔示〕（視）人，¹⁷⁶ 曰：「此鬼●敗吾，故戮之以去民害」。遂積薪於通衢焚之，而腥氣累日不散。一夕，郡人皆夢元化見別云：「暫遠遊，希善愛」。是夕寢中忽羽化，達旦，人有疑而來訪者，大小皆同。宋太宗太平興國初，進士安鴻漸寓郡中，恃才傲物，自謂無人可意，見元化則擎跽服從而就弟子列。既葬，及舉槨甚重，若有鐵石物圓轉於其中，鴻漸遂命酒致禱，則漸覺輕，臨壙發視之，則頂上有一竅可容臂，識者曰：「此蟬蛻矣」。未幾有客自河陰來，貨石榴于汝墳，途中遇一道士自云：「我乃汝墳張觀主」。託附一書，仍市石榴數十顆，獻于北極殿。客諾之，既至，其徒曰：「此書乃師之真墨●也」。引客至影堂，客曰：「向所見者，與此像略無異」。至今汝人圖像而事之。嘗撰還丹訣並小詞二闕，敘修行事，傳於世。

¹⁷⁶ 「示」據三洞群仙錄正。

塗定辭¹⁷⁷

塗定辭者，蓬之良山龍謀里人也。塗氏之先，自孟知祥據蜀時，已數世居此，躬耕植產，家累百金。宋真宗咸平中，定辭隸役于郡，因輦帛入關，遇夜，舍華陰客邸，偶有書生自稱東粵者，揖定辭而坐，相得甚懽，遂留飲浹日。及告行，書生曰：「吾陳搏也，以君非凡骨，故特邂逅于此」。定辭喜懼不自勝，因懇求異術。書生曰：「術不貴異，但養精神，不以好惡內傷則善矣」。於是袖出藥一刀圭。曰：「君但餌此，當壽百年」。翌日再訪之，則不復見。既而西歸，落魄不事生產，遂鑿所居之南山為石室，險絕數十仞，觀者毛髮皆聳，定辭梯木登陟，如履平地。初石室乾燥，每患乏水，●咒之，甘泉應期而出。居常好飼群鳥，或臨風一呼，則千數翔集，馴狎左右。每暑則挾纊自曝石上，謂之迎涼。或寒冱，則衣單縵而已。嘗遊成都，謁僧希白，因命●，食鹽一器，僅數斤，坐客皆驚異。術士王鶴與之款飲，定辭獨飲數斗不亂，又屑薑●數升雜茹之。凡賓客之來，忽言好飲食何物者，則必與之，取足同食，客雖屬屨，而不肯止。嘗以田產為人訟，移鞠于岩渠幾一歲，獄中未始具糧而訟不敢敵，典獄之官，亦以拒抗不得情，因散禁定辭。定辭遽往城北羅漢院，之江上絕崖之巔，有古木●登其上，不肯下，凡七日。人呼之則曰：「我不下，爾輩但以箭射老夫，不能彈之亦可」。然人卒不敢逼之。至第八日，不呼而自下，復居就鞠所，而赦書至。久之，請為道士。每到仲春，人服疏藥時，渠即臨流於小灘下，〔●〕（體）露〔使〕（從）水自七竅中入，¹⁷⁸謂之涮腸。嘗有二小商於脫白溪，一人中暑毒暴死，定辭持鐵針於額上以一槌擊之，入一寸許，須臾復活。明年以物來為報，

¹⁷⁷【案】三洞群仙錄卷十六「定辭涮腸」條係節錄，歷世真仙體道通鑑卷四十八著錄，文全。

¹⁷⁸「●」「使」據三洞群仙錄正。

則不受。嘗貯五十萬錢，扃鑄甚固，飲家人無妄取用，¹⁷⁹ 然子孫亦莫知其意。去世之前月，自〔石〕室歸，¹⁸⁰ 謂家人曰：「吾平生市物，凡直百錢者，必過所售之數與之。儻其間有以多為辭者，以是錢賞其廉。然終吾之身，卒無一人」。嘆世俗之貪冒如此。一日，呼家人於前曰：「我九十三歲，不死何待」。索巴豆食之，於是喫二百粒，不動移刻，更喫百粒，微微瀉泄，乃平坐而化。〔家〕人環而哭之，¹⁸¹ 卻復活。乃曰：「坐去恐汝輩難作葬具」。言訖，則臥化也。經數夕，童顏儼然如生。及就壙而棺甚輕，識者以為尸解。所居之石室，時聞蕭鼓之聲。其子為左侍禁，孫數人，舉進士。

劉從善¹⁸²

劉從善字順天，號浩然子，西洛人也。家世不仕，厥考因籍於汴之祥符。從善幼而明敏，雅好道學。宋真宗祥符中，師道士王太和于建隆觀。五年，試業為道士，以貧囊，惟求化給其親，雖祁寒暑熱，未嘗有怠，人皆稱其孝。仁宗天聖初，以乾元節賜紫衣。二年六月，承旨充景靈宮住持。三年八月，上與太后欲授法籙，詔三茅大洞法師觀妙先生朱自英於玉清昭應宮金籙壇。又降旨選明經，教勤謹焚修之士五十餘人，同壇傳授，從善首與焉。復宣賜正一法服冠履•佩等。而後，上嚴于孝享，以時追慕，特遣使諭以先帝忌辰，今於神御前咒食持課。乃編集三洞經偈頌，以薦仙駕，尋進咒食文，上嘉之，賜號全素大師，仍以其文頒諸宮觀。咒食之科自從

¹⁷⁹ 「飲」原刻誤。疑當作「誠」。

¹⁸⁰ 「石」以意補。

¹⁸¹ 「家」據三洞群仙錄補。

¹⁸² 【案】三洞群仙錄卷十七「從善借馬」條係刪節，歷世真仙體道通鑑卷四十八著錄，文全。

善始。時延寧宮告成，詔撰聖像五藏銘，應制者眾，惟從善稱旨，遂以金玉牌刻其文。景祐中，乞還本觀。未幾，章獻章惠靈駕出都，充法師，沿路講贊。至和二年乙未正月，仁宗不豫，召從善於大慶殿設醮，奏章命執政代拜，至夜伏章次，帝忽大漸，瞑目已數刻，中外驚讐，而從善遲久方起曰：「章已達太上，有●令聖駕回矣」。俄而帝甦，即傳宣問：「葛將軍何神也」？從善對曰：「三天門下有神曰葛將軍」。復傳宣曰：「速令設位供養」。翌日聖體遂康，諭左右曰：「朕昨夜夢至天門，有葛將軍者云：皇帝未合來。急借馬送回，遂寤」。久之，有旨令內侍麥承信建葛將軍觀於郊壇之西南，賜金雅飾。仍賜從善御服衽席金帛等，欲賜先生號，固辭。嘉祐初，左右街道錄薦為道官，上可其奏，授右街守闕監議，辭不獲，乃承命。五年夏，民苦大水，復拜章于福寧殿，而免昏墊。從善自守闕監議，累遷右街副錄，居常誦玉清本際西昇黃庭等經。至若服氣煉形，亦勤而行之。英宗臨御，丞相韓魏公復乞賜先生號，又辭之。神宗熙寧三年七月二十八日，沐浴訖，集弟子于前曰：「吾俟大風來，即當去」。須臾果如所說而化，降年八十一。後有客見從善白馬如蜀，託云：「見吾徒弟，煩為言之」。由是知其尸解。嘗撰集齋科及拜章式，行于世。

趙抱一¹⁸³

先生名抱一，鳳州兩當人也。父徙居梁泉蒲池，世以農桑為業。先生年十二，因牧牛遇一老人問之曰：「子飢否」？先生不應，但點頭而已，老人探手囊中，取食與之，其狀如蘿蔔而味甘，又與拄杖一條，瓢子一杖，中有藥乃豌豆也。諭之：令人服食。於

¹⁸³【案】三洞群仙錄卷二「抱一龍杖」條係刪節，歷世真仙體道通鑑卷四十八著錄，文全。

是沈●新疾，得服者無不愈。先生自食蘿蔔，不復思煙火食。久之，信步至京城之西把樓院之三門下，有一僧曰：「子無乃要出家邪」？曰：「然」！僧曰：「子去見參頭，託渠引援」。於是至院之後門草亭子上，恍然睡數日，復有一僧至，見之問其所從來，乃引入。自涅槃堂過，聞有呻吟聲，先生曰：「何人若此」？僧曰：「數（日）童行時疫方甚」。¹⁸⁴先生自瓢中傾豌豆藥，令以新汲水嚥之，即時汗如新沐人，經夕而愈。僧眾異之，傳於裏外，然後請藥者如市，而瓢中之藥愈出不竭。人所餽之物皆不受，悉與主僧。巡警官按察，雖知非幻惑人，然見人來日多，不可禁止，於是具以申朝廷。時宋真宗車駕東封未還，丞相向公留守京師，陰遣人驗其實，飛奏詣行在以聞，尋有旨令辟簡寂宮觀以居之，乃得東太一之宮齋，●先生。既就止，有司嚴其扃鑰，擊柝以固護。復令道士胡太易等以飲食伺候，日夕所食者，但棗栗三兩枚而已。凡月餘，車駕方還，召見，真宗拊其背曰：「卿，朕同姓也」。遂即披度為道士，賜名抱一。未幾求歸，上賜金鍍銀龍頭拄杖、銅朱記鸚鵡杯、香藥等，¹⁸⁵仍差中使張茂先，道士胡大易送至石門山，特與建真寂觀以為登真之所，每年賜披度及紫衣。仁宗慶曆中忽行寢罷，至宣和年間，先生復來京師，寓太乙宮之舊隱，具章以聞，乞復先帝所賜恩澤。仁宗素知先生名，覽章悉許仍舊，召見而臺諫力止之。先生兩到京，凡盡日飲酒不醉，止食少許蔬果而已。嘉祐年間，汲汲求歸，但言恐有水阻，既歸，至中秋果有大水。忽一日，遣門人咎惟甫入郡中市藥，過期未還。先生集門弟子謂曰：「我欲入奏，庭謁〔孫〕（張）尚書抃，¹⁸⁶而惟甫未還」。忽覺疲困，言訖就寢而

¹⁸⁴ 「日」字衍文。

¹⁸⁵ 「鸚鵡杯」三洞群仙錄作「癭木杯」。

¹⁸⁶ 「張抃」宋史卷四五四有傳，與文天祥同時。「張尚書抃」殆為「孫抃」之誤。宋史卷二九二孫抃傳，仁宗時曾官尚書，即其人也，今正之。

化，享年七十八歲。百日肢體尚暖，久之，精舍黃瘦，如此三年，門人乃葬之。始遇之拄杖，即真宗以龍頭者易之，其餘所賜物並存。識者謂所遇老人乃張果先生也。蓋有洞于郡之西，世傳張果隱於此。

張無夢¹⁸⁷

張無夢字靈隱，號鴻濛子。鳳翔鰲屋人也。身長六尺，風格俊爽，居常好清閑，窮老易。父為儒，肥遁不仕，有二子，無夢即其長也。篤孝聞於鄉里，及冠，以貲產委其弟，遂入華山與種放劉海蟾結方外友，事陳希夷先生，無夢多得微旨。久之，遊天台，登赤城，廬於瓊臺觀，行赤松導引，安期還丹之法。僅十餘載間，以修煉內事，形于歌詠，累成百首。題曰：還元篇。夏英公倅台州，入山見之，得此篇歸輦下。時王冀公執政，訪隱逸人，英公以還元篇獻之。未幾，以聞于上，宋真宗特召對，問以長久之策？無夢曰：「臣野人也，但於山中嘗誦老子周易而已，不知其他也」。上令講易，即說謙卦。上問曰：「獨說謙卦，何也」？曰：「方大有之時，宜守之以謙」。上喜其說，除著作左郎，無夢固辭，曰：「陛下德如堯舜，山林中豈不容一巢父許由邪」？因舍建隆之翊聖院。復召講還元篇，無夢曰：「國猶身也，心無為則氣和，氣和則萬寶結矣。心有為則氣亂，氣亂則英華散矣。此還元之大旨也」。略說十數篇而退。遣使賜金帛不受，乞還山，復賜處士暢飲先生號，亦不受。上以歌一闕賜行，其辭曰：「混元為教含醇精，視之不見聽無聲。惟有達人臻此理，逍遙物外自沈冥。浮雲舒卷絕常勢，流水方圓靡定形。乘興偶然辭澗谷，談真俄爾謁王庭。順風已得聞宗

¹⁸⁷【案】三洞群仙錄卷五「張講還元」條係刪節，歷世真仙體道通鑑卷四十八著錄，文全。

旨，枕石還期適性情。玉帛簪纓非所重，長歌聊復寵歸程」。冀公邀入私第，意欲款延，無夢曰：「萬乘且辭矣，相公人臣，徒煩見留」。明日遂行。有旨令台州給著作郎俸以養老，至山，亦不請。其始卒守節如此。有黃白術，秘而不言。居瓊臺又十餘年，復隱於終南鶴池。久之，遊嵩山，泛湘漢，抵金陵保寧壽寧佛舍，杜門不出。士人或有見而請問者，則對之以聾，而後人事幾廢。然博通古今百家之學，至于圖經小史，記之歷歷無遺。有二經生侍几案，久之，因度為道士。無夢年九十九，終于金陵。經三日，頂中有白氣勃勃然出，高三尺餘，移時方散。乃就棺，肢體柔軟，指甲不青，心胸尚暖。史君玉琪遣吏藏于悟空禪師塔前。有瓊臺詩集行於世。碧虛子陳景元嘗預弟子列，得老莊之深旨。